

EL SANTO EVANGELIO SEGUN SAN JUAN

Ñee oyeapo cuimbaera

¹ Ndei mbae oyeapo mbove, oico Ñee. Jare Ñee oico Tumpa ndive. Jae co Tumpa etei.

² Ñee oico Tumpa ndive ndei mbae oyeapo mbove.

³ Jae oyapo opaete. Opaete oyeapo vae jae etei oyapo.

⁴ Jae omeecove opaete pe, jare cuae tecove rupi jae oyecuaa ivi pegua reta pe mbaembae oyecuaa tembipe rupi rami.

⁵ Jae co tembipe rami. Tembipe jecuaeño oesape pitumimbi pe, jare pitumimbi mbaeti etei ipuere ombogüe.

⁶⁻⁷ Oico metei cuimbae Juan jee vae. Tumpa ombou cuae cuimbae omombeu vaera tembipe, iru vae reta oporogüirovia vaera oendu yave.

⁸ Jae mbaeti co jocuae tembipe. Jaeño ou omombeu vaera jocuae tembipe.

⁹ Tembipe etei ou ma cuae ivi pe. Jae oyecuaa opaete vae pe.

¹⁰ Jae oico cuae ivi pe, jare jae oyapo cuae ivi. Erei ivi pegua reta mbaeti oicuaa.

¹¹ Ou jenta pe, erei jentaigua reta mbaeti omboresive.

¹² Erei amogüe vae omboresive. Güirovia jese. Jae rambue jae omeecuae reta pe Tumpa tai reta jare tayi reta yogüireco vaera.

13 Tumpa etei omee cuae reta pe tecove. Cuae tecove mbaeti ichi güi. Mbaeti güinoi cuae tecove tu jemimbota jeco pegua.

14 Jocuae Ñee oyeapo cuimbaera. Ou cuae ivi pe oico vaera ñande ndive. Jare ore roecha maemboete pegua co jae. Jaeño Tumpa Tai jae vaeño cuae maemboete güinoi. Jae ipiacavi yae jare opaete jei vae añete co.

15 Echa Juan omombeu iru vae reta pe:

—Cuae co jae chemiari jese vae —jei chupe reta—. Che jae ma peve: Cheraicue outa vae ipuere yae chegüi. Echa jae oico ndei aico mbove —jei.

16 Jocuae Ñee ipiacavi yae. Jae rambue jecuaeño oyapo icavi vae ñandeve.

17 Tumpa omombeu mboroócuai Moisés rupi. Erei Jesucristo rupi Tumpa omombeu ipiacavi co jare ñanemboe añete vae re.

18 Mbaeti etei quia oecha Tumpa. Erei Tumpa Tai jae vaeño oicuauca ñandeve. Tumpa oaiu Tai.

Juan oporombobautiza vae omombeu vae

19 Mete ara yogüiraja ovae Juan oia pe sacerdote reta jare levita reta. Jerusalén pegua judío reta omondo cuae reta chupe. Jae reta jei Juan pe:

—¿Quia pa co nde?

20 Juan omombeu cavi. Mbaeti iyapu chupe reta.

—Che mbaeti co Cristo jee vae —jei chupe reta.

21 Jayave oparandu reta ye chupe:

—Mbaeti yave, ¿nde pa co jae Elías jee vae?

Juan jei ye:

—Mbaeti co.

Jei reta ye chupe:

—¿Nde pa co jocuae Tumpa iñee omombeu vae?

—Mbaeti —jei ye Juan chupe reta.

²² Jayave oparandu reta ye chupe:

—¿Quia pa co nde? Echa roipota romombeu orembou vae reta pe. ¿Mbae pa rere ndeyeupe? — jei reta Juan pe.

²³ Jayave Juan jei:

—Che co jae metei ñee mbae omombeu vae. Cheñeeata ñuu pe: Peyapocavi ñandeYa japera. Jocorai che jae —jei Juan—. Echa jocorai jei Isaías aracae Tumpa iñee omombeu vae —jei.

²⁴ Cuae Juan oia pe yogüiraja vae reta fariseo reta co.

²⁵ Oparandu reta ye Juan pe:

—Nde mbaeti yave Cristo ani Elías ani jocuae Tumpa iñee omombeu vae, ¿maera pa reporombobautiza?

²⁶⁻²⁷ —Che aporombobautiza i pe —jei Juan—. Erei yepe tei mbaeti peicuaa, erei oime pepite pe jocuae cheraicue outa vae. Mbaeti jupi che amboi vaera ipiapaa —jei chupe reta.

²⁸ Opaete cuae oyeapo Betábara pe iaca Jordán jee vae jovaicho pe. Echa joco pe oporombobautiza Juan.

Tumpa ombou vae

²⁹ Piareve pe Juan oecha Jesús ou icoti jare jei:

—Mase, pee oi Tumpa ombou vae. Jae co vecha rami. Ou güiraja vaera opaete ivi pegua reta imbaeyoa —jei—.

³⁰ Cuae co jae chemiari jese vae. Che jae ma peve: Cheraicue outa vae ipuere yae chegüi. Echa jae oico ndei aico mbove. Cuae co jae —jei Juan—.

³¹ Che mbaeti aicuaa. Erei ayu aporombobautiza i pe jae oyecuaa vaera Israel pegua reta pe — jei chupe reta.

³² Juan omombeu ye chupe reta:

—Aecha Espíritu Santo ogüeyi ara güi picasu rami jare ou opita jese —jei—.

³³ Che mbaeti aicuaa. Erei chembou aporombobautiza vaera i pe vae jei cheve: “Reechata Espíritu Santo ogüeyi ou opita metei cuimbae re. Jocuae cuimbae oporombobautizata Espíritu Santo pe” —jei, jei Juan—.

³⁴ Jocuae aecha ma jare amombeu peve cuae co jae Tumpa Tai —jei.

Jesús jemimboe tenondegua vae reta

³⁵ Piareve pe Juan oñemboi ye oi joco pe mócoi jemimboe ndive.

³⁶ Jayave ou Jesús oasa jcoropi. Juan omae ngatu jese.

—Mase, pee oi Tumpa ombou vae. Jae co vecha rami —jei.

³⁷ Jocuae mócoi jemimboe oendu jare yogüiraja Jesús jaicue.

³⁸ Jesús oyerova yave, oecha yogüeru icoti.

—¿Mbae pa peeca? —jei chupe reta.

—¿Quiape pa reico, Rabí? —jei reta. (Rabí oipota jei: Oporomboe vae.)

³⁹ —Peyu peecha —jei Jesús.

Jayave yogüiraja Jesús oicoa pe oecha, jare opita jocuae ara jae ndive. Echa cuaraí ara mbite seri ma.

⁴⁰ Mócoi cuimbae co jocuae Jesús jaicue yogüiraja vae. Echa yogüiraja jaicue oendu yave

Juan jei chupe reta vae. Metei cuimbae jee co Andrés. Jae co Simón Pedro tiví.

⁴¹ Andrés ojo rani ovae tiquei Simón jare jei chupe:

—Rovae ma Mesías. (Cuae oipota jei hebreo iñee pe: Cristo.)

⁴² Jayave Andrés güeru Simón Jesús oia pe. Jesús omae ngatu Simón re jare jei:

—Nde co jae Simón. Nde co jae Jonás tai. Torombojee Cefas. (Cuae oipota jei: Pedro.)

Jesús oeni Felipe jare Natanael

⁴³⁻⁴⁴ Piareve pe Jesús oipota ojo Galilea pe. Jare ovae Felipe Betsaida pegua. Andrés jare Pedro Betsaida pegua vi. Jesús jei Felipe pe:

—Eyu cherupíe.

⁴⁵ Jayave Felipe ojo ovae Natanael jare jei chupe:

—Rovae ma Moisés mboroócuai pe imiari jese vae. Aracae Tumpa iñee omombeu vae reta vi imiari jese —jei—. Jae co Jesús Nazaret pegua. Jae co José tai —jei chupe.

⁴⁶ —¿Oime pa mbae icavi vae Nazaret pegua? — jei Natanael.

—Yaja eecha —jei Felipe.

⁴⁷ Jesús oecha Natanael ou icoti jare jei:

—Mase, co ou metei Israel pegua añetete vae. Jecuaeño oyapo añete vae rupi —jei.

⁴⁸ Natanael oparandu Jesús pe:

—¿Quirai pa checuaa?

Jesús jei chupe:

—Ndei Felipe imiari ndeve mbove, che roecha ìva igüi pe.

49 —Nde co jae Tumpa Tai, Rabí —jei Natanael—. Nde co jae Israel pegua reta juvicha guasu —jei.

50 Jesús jei ye chupe:

—Amombeu ndeve che roecha iva igüi pe. ¿Cuae jeco pegua ra reporogüirovia ma? —jei—. Reechata mbaembae reporogüirovia yae vaera —jei—.

51 Añete che jae ndeve, reechata ara oyepea oi, jare reechata vi araigua Tumpa pe oyeócuai vae reta oyeupi ñogüinoi jare ogüeyi ñogüinoi che aia pe. Che co jae cuimbaera oyeapo vae —jei Jesús.

2

Metei menda Caná pegua

1 Mboapi ara rupi metei cuimbae omenda cuñatai ndive Caná Galilea pegua pe, jare Jesús ichi oi joco pe.

2 Jare oparea reta vi Jesús jare jemimboe reta pe.

3 Vino opa ma yave, Jesús ichi jei Jesús pe:

—Opa ma vino.

4 —¿Ndepiatiti pa cuae re? Che mbaeti co chepiatiti jese, cuña —jei Jesús—. Ndei ovae cheparaviqui ayapo vaera —jei.

5 Jayave Jesús ichi jei joco pe oyeócuai vae reta pe:

—Peyapo omombeuta peve vae.

6 Joco pe ñogüinoi seis iriru tuicha vae ita pegua. Judío reta oiporu jocuae nunga iriru mbaembae oyoe vaera. Oñemongueta oyetio cavi Tumpa coti jorai oyapo yave. Iriru ñavo ipuere tinie cinco iru i pe.

7 Jesús jei tembiócuai reta pe:

—Pemotinie cavi iriru reta i pe.

Jayave jae reta omotinie cavi.

⁸ Jesús jei ye chupe reta:

—Añave peñoe peraja peruvicha pe.

Jayave jocorai oyapo reta.

⁹ Tembiócuai reta juvicha jou jocuae i vinora oyeapo vae. Jae mbaeti oicuaa quia güi ra ou jocuae jou vae, erei jembiócuai reta oicuaa catu quia güi co oñoe. Jayave mburuvicha oeni cuimbae omenda vae.

¹⁰ —Opaete iru vae reta omee vino icavi vae rani mboupa reta pe. Jayave jeta vino jou yave ramo omee chupe reta vino mbaeti icavi mbatee vae — jei chupe—. Erei nde añave ramo remee vino icavi yae vae —jei.

¹¹ Jesús cuae oyapo Caná Galilea pegua pe. Corai Jesús omboipi oicuauca jemimboe reta pe jae imbaepuere tuicha yae co. Jare cuae oyapo vae jeco pegua jemimboe reta güirovia jese.

¹² Cuae jaicue rupi Jesús ojo Capernaúm pe. Yogüiraja vi jae jupíe ichi jare tiví reta jare jemimboe reta. Jare opíta reta joco pe mboví ara.

Jesús Tumpa jo pe oyapo vae

¹³ Jare coiño ma ou judío reta iyarete pascua jee vae iara. Jayave Jesús ojo Jerusalén pe.

¹⁴ Joco pe Tumpa jo pe oecha omaemee vae reta. Omee ñogüinoi güeye reta jare vecha reta jare picasu reta. Oecha vi corepoti omocambio vae reta uguapi ñogüinoi joco pe.

¹⁵ Jayave Jesús oyapo chicote piola pegua jare omoe omaemee vae reta jare vecha reta jare güeye

reta Tumpa jo güi. Jayave opiyere corepoti omocambio vae reta icorepoti jare omboyapara imesa reta.

¹⁶ Jare jei pıcasu omee vae reta pe:

—Peraja cuae güi cuae reta. Agüıye pemee mbaembae cheRu jo pe —jei.

¹⁷ Jayave jemimboe reta imaendúa quirai oime Tumpa iñee pe oyecuatía oi corai: “Aipota yae Tumpa jo oñemboeteuca vaera. Cheratangatu yae jese. Jae rambue cuae jeco pegua iru vae reta oyapota icavi mbae vae cheve.” Jocrori oyecuatía oi.

¹⁸ Jayave judío reta oparandu Jesús pe:

—¿Mbae nunga miacañi pa reechaucata oreve roicuaa vaera oime ra renoi mbaepuere cuae mbaraviqui reyapo vae reyapo vaera?

¹⁹ Jesús jei chupe reta:

—Pembosururu yave cuae Tumpa jo, amoicavi yeta co mboapi ara pe.

²⁰ —Oparaviqui reta cuarenta y seis año oyapo vaera cuae Tumpa jo —jei judío reta—. ¿Remoicavi yeta ra nde mboapi ara pe? —jei.

²¹ Erei Jesús imiari chupe reta jete ae re. Echa jete co jae Tumpa jo.

²² Jae rambue Jesús oicove ye yave ou omanogüe vae reta ipite güi, jemimboe reta imaendúa cuae jei vae re. Jayave güirovia aracae Tumpa iñee pe oyecuatía oi vae jare jocuae Jesús jei chupe reta vae.

Jesús oicuaa opaete vae

²³ Jesús opıta Jerusalén pe arete pascua iara pe. Joco pe oi rambueve, omombeu iru vae reta pe quia co jae. Jayave jeta oendu vae güirovia

jese miacañi oyapo jae reta oicuaa vaera vae reta oecha reta yave.

²⁴ Erei Jesús mbaeti güirovia añetete cuae reta iporogüirovia. Echa oicuaa cavi opaete ivi pegua reta.

²⁵ Jae mbaeti omonesesita quia omombeu vaera chupe ivi pegua reta regua. Echa jae oicuaa cavi ivi pegua reta ipia pe oi vae.

3

Jesús jare Nicodemo

¹ Oico metei fariseo Nicodemo jee vae. Jae co judío reta juvicha.

² Cuae cuimbae ou Jesús oia pe pitu yave jare jei chupe:

—Rabí, roicuaa co Tumpa nembou reporomboc vaera. Echa mbaeti quia ipuere oyapo jocuae nunga miacañi reyapo vae Tumpa mbaeti yave oi jae ndive —jei.

³ —Añete che jae ndeve —jei Jesús Nicodemo pe—, oime yave quia oipota oico Tumpa iporoocuaia pe vae, güinoita rani co tecove ipiau vae —jei.

⁴ —¿Quiraita pa co ñandepuere tecove ipiau vae ñanoi ñanendechi ma yave? —jei Nicodemo—. Mbaeti etei ñandepuere yaique ye ñandesí jie pe yaa ye vaera —jei.

⁵ Jesús jei ye chupe:

—Añete che jae ndeve, oime yave quia oipota oico Tumpa iporoocuaia pe vae, güinoita rani co tecove ipiau vae i jare Espíritu Santo rupi —jei—.

⁶ Yaa yave ñandesí güi, ñanoi tecove ivi peguaraño. Erei Espíritu Santo omeë ñandeve tecove Espíritu pegua —jei—.

7 Amombeu ma ndeve quirai penoita rani co tecove ipiau vae. Agüiye nepiacañi cuae re —jei chupe—.

8 İvitu oyepeyu oipotagüe rupi güi jare reendu jiapu. Erei mbaeti reicuaa queti güi ra ou jare queti ra ojo. Jocrai co oi Espíritu Santo omeecove chupe vae —jei Jesús.

9 Nicodemo oparandu ye Jesús pe:

—¿Quiraita pa co oyeapo cuae?

10 Jesús oparandu Nicodemo pe:

—¿Mbaeti pa reicuaa cuae? Echa nde co jae Israel pegua reta omboe vae —jei—.

11 Añete che jae ndeve, oremiari roicuaa vae re jare romombeu roecha vae. Erei mbaeti perovia romombeu peve vae —jei—.

12 Amombeu ma peve mbaembae oyeapo ivi pe vae, erei mbaeti chererovia. ¿Quiraita pa pepuere chererovia mbaembae oyeapo ara pe vae amombeu peve yave? —jei Jesús Nicodemo pe—.

13-14 Mbaeti quia ye oyeupi ojo ara pe, jaefio che ara güi agüeyi ayu vae. Che co jae cuimbaera oyeapo vae ara pe oi vae —jei chupe—. Moisés aracaie oupi jocuae mboi, ñuu pe oico yave. Jocrai vi iru vae reta chereupita co,

15 oipotagüe güirovia cheré vae güinoi vaera tecove opa mbae vae. Ngaraa ojo cañitei pe —jei.

Tumpa oaiu yae ivi pegua reta

16 Echa Tumpa oaiu yae ivi pegua reta. Jae ram-bue omeecove Tai jae vaeño, oipotagüe güirovia jese vae güinoi vaera tecove opa mbae vae. Ngaraa ojo cañitei pe.

17 Tumpa ombou Tai ivi pe, ivi pegua reta oñemboasauca vaera jae jeco pegua. Tai mbaeti ou ojaa vaera ivi pegua reta.

18 Güirovia Tumpa Tai re vae reta ngaraa ma oñejaauca. Erei iru vae reta oñejaauca ma co. Echa Tumpa Tai jae vaeño omombeu ma quia co jae. Erei jae reta mbaeti güirovia.

19 Tembipe ou ma ivi pe, erei ivi pegua reta oipota yae yogüireco pitumimbi pe. Mbaeti oipota yogüireco tembipe pe. Echa oyapo reta icavi mbae vae. Jae rambue oñejaauca reta ma co.

20 Oipotagüe icavi mbae vae oyapo vae omotarei tembipe. Mbaeti ou tembipe oia pe agüiye vaera iru vae reta oicuaa mbae oyapo vae.

21 Erei añete pegua rupi oico vae ou tembipe oia pe, iru vae reta oicuaa vaera mbaraviqui oyapo vae oyapo co Tumpa jemimbota rupi.

Omendata vae iamingo

22 Cuae jaicue rupi Jesús jare jemimboe reta yogüiraja ivi Judea jee vae pe. Joco pe opita Jesús jae reta ndive jare oporombobautizauca oi.

23 Juan vi oporombobautiza oi Enón pe. Enón coiño oi Salim güi. Echa joco pe jeta i oi. Jare amogüe vae yogüeru jare Juan ombobautiza reta.

24 Echa Juan ndei oyererajauca tembipiriru pe.

25 Jayave Juan jemimboe reta oyoaca ñogüinoi judío reta ndive quirai ipuere oyetiö cavi Tumpa peguara vae re.

26 Jayave yogüeru Juan oia pe jare jei chupe:

—Rabí, nde remombeu ma oreve Jordán jovai-cho pe nde ndive oise vae regua. Mase, jae

oporombobautiza oi, jare opaete vae yogüiraja ñogüinoi jae oia pe —jei reta Juan pe.

27 Jayave Juan jei chupe reta:

—Tumpa omeë ñandeve vaeño ñandepuere ñanoi.

28 Che jae ma peve: Che mbaeti co Cristo. Jaeño Tumpa che rani chembou chugüi. Pe reta etei peicuaa corai co che jae peve —jei chupe reta—.

29 Jae co metei cuimbae omendata vae rami. Che co omendata vae iamingo rami. Echa omendata vae iamingo opita omendata vae ndive jare oyeapisaca jese jare oyerovia yae iñee oendu yave. Jocraino vi co che ayerovia yae —jei—.

30 Echa jeta vae yogüirajata jae oia pe erei mboviño ma co yogüeruta che aia pe —jei Juan chupe reta.

Ara güi ou vae

31 Ara güi ou vae ipuere opaete iru vae reta güi. Ivi pegua reta ivi peguaño co jare imiari mbaembae ivi pe oi vae re. Ara güi ou vae ipuere opaete iru vae reta güi.

32 Jae omombeu oecha jare oendu vae, erei mbaeti quia güirovia jae omombeu vae.

33 Jae omombeu vae güirovia vae oicuauca iru vae reta pe güirovia co Tumpa iñee añete co.

34 Echa jocuae Tumpa ombou vae omombeu Tumpa iñee, jare Tumpa omeë chupe Espíritu Santo opaete imbaepuere reve.

35 Tu oaiu Tai jare oyapo ma opaete mbaembae juvichara.

36 Tumpa Tai re güirovia vae güinoi ma tecove opa mbae vae. Tumpa Tai re mbaeti güirovia

vae ngaraa güinoi tecove. Tumpa jecuaeño pochi chupe.

4

Jesús jare cuña Samaria pegua

¹ÑandeYa Jesús oendu jeracua ma co fariseo reta pe corai: Jesús oyapo oi jare ombobautiza oi jeta jemimboe retara Juan güi. Jocorai jeracua.

²Erei Jesús etei mbaeti oporombobautiza. Jemimboe retaño oporombobautiza ñogüinoi.

³Jayave cuae oicuaa yave, Jesús oe Judea güi ojo ye Galilea pe.

⁴Jare ojo Samaria rupi. Echa tape oasa jocoropi.

⁵Jayave ojo ovae tenta Sicar jee vae pe. Jocuae tenta Samaria pegua co, jare coiño oi ivi Jacob aracae omee tai José pe vae güi.

⁶Jocuae ivi pe oi metei icua. Jocuae icua jee Jacob iyicua. Jayave Jesús oguapí icua iyipi pe. Echa mombiri ma oguata, jare icanguí yae. Jare cuarai ara mbite ma.

⁷Jayave ou ovae metei cuña Samaria pegua i güinoe vaera. Jare Jesús jei chupe:

—Emee taiu.

⁸Echa Jesús jemimboe reta yogüiraja tenta pe jembura ogua vaera.

⁹Jayave cuña Samaria pegua jei Jesús pe:

—Nde co jae metei judío jare che co jae metei Samaria pegua. ¿Maera pa nde rere cheve: Emee taiu? —jei.

(Echa judío reta mbaeti etei oipota imiari Samaria pegua reta ndive.)

¹⁰Jayave Jesús jei cuña pe:

—Che jae ma ndeve: Emee taiu. Reicuaa yave Tumpa oipota omee ndeve vae jare reicuaa yave quia co che, reyerureta tei co cheve jare che ameeta tei co ndeve i tecove güinoi vae —jei Jesús.

¹¹ —Carai —jei cuña Jesús pe—, nde mbaeti mbae renoi i renoe pipe vaera, jare cuae i mombiri oi ivigüi pe. ¿Quia güi pa reruta jocuae i tecove güinoi vae? —jei—.

¹² ¿Tuicha yae pa nembraepuere ñanetenondegua Jacob imbraepuere güi? Echa Jacob omee ñandeve cuae i. Jae etei jare tai reta jare jimba reta oiu cuae güi —jei cuña.

¹³ Jesús jei chupe:

—Oipotagüe cuae i güi oiu vae i oyúe yeta co.

¹⁴ Erei oipotagüe i che ameeta oiu vae ngaraa ye iyúe —jei—. Echa jocuae i che ameeta chupe vae oyeapota ipia pe metei i jesai vae rami. Jecuaño omeeta chupe tecove opa mbae vae —jei.

¹⁵ —Carai —jei cuña—, emee cheve cuae i, agüiye ye vaera i ayúe jare agüiye ye vaera ayu cuae pe i anoe vaera —jei.

¹⁶ Jayave Jesús jei chupe:

—Ecu a eeni neme peyu cuae pe.

¹⁷ —Mbaeti cheme —jei cuña.

—Añete co rere: “Mbaeti cheme” —jei Jesús cuña pe—.

¹⁸ Echa renoi ma cinco neme, jare jocuae cuim-bae añave renoi vae mbaeti co neme. Añete co rere —jei.

¹⁹ —Carai —jei cuña—, añave aicuaa nde co jae metei Tumpa iñee omombeu vae —jei—.

²⁰ Ñanetenondegua reta omboete Tumpa cuae iviti re. Erei pe reta pere Jerusalén pe oi Tumpa jo, jare

joco peño iru vae reta vi omboeteta tei Tumpa –jei cuña.

²¹ –Chererovia, cuña –jei Jesús—. Outa ma ara agüiye vaera pemboete cheRu cuae iviti reño ani Jerusalén peño –jei—.

²² Pe reta pemaemboete yave, mbaeti peicuaa cavi mbae pemboete vae. Ore romaemboete yave, roicuaa cavi co mbae romboete vae. Echa iru vae reta oñemboasauca judío reta rupi –jei—.

²³ Erei outa ma ara - ou ma co - añetete Tumpa omboete vae omboete vaera Espíritu Santo rupi. Omboeteta añete vae rupi –jei—. Echa cheRu oeca cuae nunga jae reta omboete vaera –jei—.

²⁴ Tumpa co jae Espíritu. Omboete vae reta tomboete Espíritu Santo rupi jare añete vae rupi –jei Jesús.

²⁵ Jayave cuña jei Jesús pe:

–Aicuaa Mesías outa co - jae co Cristo jee vae - jare jae ou yave, omombeuta ñandeve opaete mbaembae regua –jei.

²⁶ –Jae co che chemiari ai nde ndive vae –jei Jesús.

²⁷ Cuae jei oi yave, Jesús jemimboe reta yogüeru ovae. Ipiacañi Jesús imiari oi cuña ndive vae re. Erei mbaeti metei ave jei chupe: “¿Mbae pa reipota?” ani “¿Maera pa nemiari jae ndive?”

²⁸ Jayave cuña oeya iyiru joco pe jare ojo ovae tenta pe. Jei cuimbae tenta pegua reta pe:

²⁹ –Pecua peecha cuimbae opaete ayapogüe omombeu cheve vae. ¿Jae yepe ra Cristo? –jei.

³⁰ Jayave cuimbae reta oe tenta güi yogüeru Jesús coti.

31 Cuña ojo ma yave, Jesús jemimboe reta jei chupe:

—Rabí, ecaru.

32 —Oime anoi cherembiura pe reta mbaeti pecuaa vae —jei Jesús chupe reta.

33 Jayave jemimboe reta jei oyoupe:

—¿Güeru ma ra quia mbae jou vaera?

34 —Che ayapo chembou vae oipota ayapo vaera vae, jare opaete iparaviqui ayapo —jei Jesús—. Cuae co cherembiura rami —jei—.

35 Pe reta pere: “Irundi yasi rupi mbaarivo oita ma co”. Erei che jae peve: Mase, pema co reta re. Joco pe oi vae yagüiye ma co. Ovae ma mbaarivo —jei Jesús—.

36 Jare tecove opa mbae vae oñemee chupe vae oyearivo vae rami co. Jare temiti iya omboepi ombaarivo vae pe, omaeti vae jare ombaarivo vae oyerovia pave vaera —jei—.

37 Jorai añete co cuae: “Meteti vae omaeti jare iru vae ombaarivo” —jei—.

38 Che pomondo pearivo vaera mbaeti peparaviqui jese vae. Iru vae reta oparaviqui jese, jare pe reta pearivo jae reta oparaviqui rambue —jei Jesús chupe reta.

39 Jare jeta jocuae tenta pegua reta - Samaria pegua reta co - güirovia Jesús re cuña omombeu chupe reta vae jeco pegua. Echa cuña jei ma chupe reta: “Opaete ayapogüe omombeu cheve”.

40 Jayave Samaria pegua reta yogüeru ovae yave Jesús oia pe, jei chupe:

—Ecu orerenta pe epita ore ndive.

Jayave Jesús ojo opita joco pe mócoi ara.

⁴¹ Jare jeta iru vae reta oporogüirovia Jesús etei jei chupe reta vae jeco pegua.

⁴² Jayave jei reta cuña pe:

—Tenonde yave roporogüirovia nde rere oreve vae jeco pegua. Erei añave roporogüirovia ore etei roendu rambue, jare añave roicuaa cuae co jae ivi pegua reta omboasa vae Cristo jee vae —jei reta.

Jesús ombogüera mburuvicha tai

⁴³ Mócoi ara rupi Jesús ojo joco güi Galilea coti.

⁴⁴ Echa Jesús etei jei metei Tumpa iñee omombeu vae jentaigua reta mbaeti omboete.

⁴⁵ Jayave Jesús ojo ovae yave Galilea pe, joco pegua reta omboresive cavi. Echa oecha reta ma opaete Jesús oyapo Jerusalén pe arete pe vae. Echa jae reta vi yogüiraja arete pe.

⁴⁶ Jayave Jesús ojo ovae Caná Galilea pegua pe. Joco pe tenonde yave oyapo i vinora. Jare oico Capernaum pe metei mburuvicha. Cuae cuimbae tai imbaerasi oi.

⁴⁷ Jare oicuaa yave Jesús ou ma co Judea güi ovae Galilea pe, ou ovae Jesús oia pe jare oyerure chupe tai re.

—Ecu cherenta pe embogüera cheraí —jei—. Echa omanota ma.

⁴⁸ —Mbaeti yave aechauca peve miacañi reta, ngaraa perovia cheré —jei Jesús chupe.

⁴⁹ —Carai —jei mburuvicha—, ecua cherenta pe agüiye vaera cheraí omano.

⁵⁰ —Ecu —jei Jesús chupe—. Nderai oicove catu ye ma oi —jei.

Jayave mburuvicha güirovia Jesús jei chupe vae jare ojo ye jenta coti.

51 Jare ojo rambueve jenta coti, jembíocuai reta yogüeru oovaiti jare jei chupe:

—Oicove catu ye ma oi nderai.

52 Jayave mburuvicha oparandu chupe reta:

—¿Mbae ora pe pa omboipi ocuera?

—Carumbue neimbove nungañõ jacu opita chugüi —jei reta chupe.

53 Jare cunumi tu oicuaa jocuae ora pe etei co Jesús jei chupe: “Nderai oicove catu ye ma oi”. Jayave oporogüirovia jae jare opaete jo pegua reta.

54 Cuae miacañi oyapo Jesús oicuauca vaera quia co jae, ou yave Judea güi Galilea pe. Mocoia co cuae miacañi.

5

Cuimbae mbaeti ipuere oguata vae

1 Cuae jaicue rupi judío reta oyapo ñogüinoi arete, jare Jesús ojo Jerusalén pe.

2 Jare oime Jerusalén pe vecha reta oñemeea jonque iyipi pe metei i jesai vae tipi vae hebreo iñee pe Betesda jee vae. Oime cuae i iyiviri cinco o-rai.

3 O-rai japipe pe oñeno ñogüinoi jeta imbaerasi vae reta. Joco pe ñogüinoi jesa mbae vae reta, mbaeti ipuere oguata vae reta, jare mbaeti ipuere omii vae reta. Opaete cuae reta oaro ñogüinoi i omii vaera.

4 Echa amoamo pe ogüeyi metei araiagua omomii vaera i. Jare i omii ma yave, jocuae imbaerasi vae tenonde voi oique i pe vae ocuera oipotagüe imbaerasi güi.

⁵ Jare imbaerasi vae reta ipite pe oi metei cuimbae treinta y ocho año ma mbaeti ipuere uguata vae.

⁶ Jesús oecha cuimbae oñeno oi joco pe, jare oicuaa ima yae ma imbaerasi. Jayave oparandu chupe:

—¿Reipota pa recuera?

⁷ —Carai —jei cuimbae—, mbaeti anoi quia cheñono vaera i pe i omi yave. Che aja rambueve, iru vae oique i pe tenonde chegüi —jei.

⁸ Jayave Jesús jei ye chupe:

—Epúa evoi nderupa jare uguata.

⁹ Jayave cuimbae ocuera voi, jare ovoï jupa uguata. Jare jocuae ara mbutuu iara co.

¹⁰ Jayave judío reta jei cuimbae ocuera ma vae pe:

—Cuae ara mbutuu iara co. Mbaeti jupi revoi vaera nderupa mbutuu iara pe —jei reta.

¹¹ Cuimbae jei chupe reta:

—Cuimbae chembogüera vae jei cheve: “Evoi nderupa jare uguata” —jei cheve, jei.

¹² Jayave oparandu reta chupe:

—¿Quia pa jae “Evoi nderupa jare uguata” jei ndeve vae?

¹³ Erei ocuera vae - tenonde yave mbaeti ipuere uguata vae - mbaeti oicuaa. Echa jeta yae vae joco pe ñogüinoi jare Jesús ojo ma joco güi.

¹⁴ Ndei ima mbove Jesús ovae cuimbae Tumpa jo pe.

—Recuera ma co. Jae rambue agüiye ye eyapo icavi mbae vae. Echa reyapo ye yave, mbae icavi mbae yae vae oyeapota ndeve —jei.

15 Jayave cuimbae ojo omombeu judío reta pe Jesús co jae ombogüera ma vae.

16 Jare Jesús oyapo ma amogüe cuae nunga miacañi mbutuu iara pe. Cuae jeco pegua judío reta oipota oyapo icavi mbae vae chupe. Oipota vi oyuca.

17 Erei Jesús jei chupe reta:

—CheRu jecuae oparaviqui, jare che vi aparaviqui.

18 Cuae jeco pegua judío reta oipota yae oyuca Jesús. Echa Jesús oyapo mbutuu iara pe jae reta jei mbaeti jupi oyeapo vaera vae, jare Jesús imiari yave, jei: “Tumpa etei co cheRu”, jare cuae oipota jei jae vi co Tumpa etei.

Tumpa Tai imbaepuere

19 Jayave Jesús jei ye chupe reta: —Añete che jae peve, che co jae Tumpa Tai. Che aeño mbaeti mbae chepuere ayapo. Ayapo jocuae aecha cheRu oyapo oi vaeño. CheRu oyapo oi vae che vi ayapo —jei—.

20 Echa cheRu cheraiu jare oicuauca ma cheve opaete iparaviqui. Jare oicuaucata vi cheve mbaraviqui tuicha yae cuae reta güi vae, pepiacañi yae vaera jese —jei Jesús chupe reta—.

21 CheRu omeecove omanogüe vae reta pe. Jae ramiño vi che amee tecove amogüe vae reta pe. Ameer aipota vae pe —jei—.

22 CheRu ngaraa ojaa ivi pegua reta. Echa omaeñota cheré ajaa vaera —jei—.

23 Jocrari opaete vae chemboeteta omboete cheRu rami. Mbaeti chemboete vae mbaeti vi omboete cheRu. Echa che co jae Tumpa Tai —jei—.

24 Añete che jae peve, cheñee peendu yave jare chembou vae perovia yave, penoi ma tecove opa mbae vae. Ngaraa ma peñejaauca.

25 Añete che jae peve, outa ma ara - jaema ou - omanogüe vae reta oendu vaera cheñee - che co jae Tumpa Tai - jare oendu vae reta oicove yeta co —jei Jesús chupe reta—.

26 Echa cheRu ipuere omee tecove. Jae ramiño vi omaeño cheré amee vaera tecove —jei—.

27 Jare cheRu omee cheve mbaepuere ajaa vaera ivi pegua reta che ayeapo cuimbaera rambue —jei—.

28 Agüiye pepiacañi cuae re. Echa outa ma ara opaete omanogüe oñeoti oi vae reta oendu vaera cheñee —jei—.

29 Icavi vae oyapo vae reta oicove yeta yogüeru tecove opa mbae vae güinoi vaera, jare icavi mbae vae oyapo vae reta oicove yeta yogüeru oñejaauca vaera —jei Jesús chupe reta—.

Cristo regua omombeu vae reta

30 Che aeiño mbaeti mbae chepuere ayapo. Che aporojaa cheRu omombeu cheve vae rupi. Jae rambue aporojaa jupi vae rupi. Echa mbaeti ayapo cheremimbotaiño rupi. Ayapo chembou vae jemimbota rupi —jei—.

31 Yepe tei chemiari peve cheyee, erei añete vae co che amombeu peve vae.

32 Oime iru chemombeu vae, jare aicuaa jae jei peve cheré vae añete co —jei—.

33 Echa pe reta pemondo cuimbae reta Juan re oyeapisaca vaera, jare jae jei cheré vae añete co —jei—.

34 Che mbaeti amonesesita quia chemombeu vaera, erei cuae che jae peve peñemboasauca vaera —jei Jesús—.

35 Juan co jae metei mechero rami. Echa mechero jendi jare omee ñandeve tembipe. Ima ngatu mi rupi icavi echa peve peyerovia vaera tembipe Juan omee peve vae re —jei—.

36 Cuae mbaraviqui ayapo vae reta chemombeu yae Juan güi. CheRu oipota opa ayapo vaera cuae mbaraviqui reta, jare cuae ayapo vae rupi aicuaucua iru vae reta pe cheRu chembou co —jei—.

37 CheRu chembou jare jae etei chemombeu. Mbaeti etei peendu cheRu iñee jare mbaeti etei peeche —jei—.

38 Mbaeti peyapo cheRu jei peve peyapo vaera vae. Echa jae chembou, erei mbaeti chererovia —jei—.

39 Jecuaeño pemongueta Tumpa iñee pe oye-cuatía oi vae. Echa peñemongueta joco pe pe-vae quirai pepuere penoi tecove opa mbae vae. Jare Tumpa iñee pe oyecuatía oi vae che co chemombeu —jei Jesús chupe reta—.

40 Erei mbaeti peipota perovia cheré tecove opa mbae vae amee vaera peve —jei—.

41 Che mbaeti ayeco maemboete ivi pegua reta omee vae re.

42 Echa aicuaa pe reta mbaeti peaiu Tumpa pepia pe —jei—.

43 Che ayu cheRu chembou rambue, erei pe reta mbaeti chemboresive. Iru vae ou yave jemimbota ae rupi, pemboresiveta co —jei—.

44 Mbaeti etei pepuere peporogüirovia. Echa jecuaeño pe reta peñomboete, erei mbaeti peipota

maemboete Tumpa oipota tei penoi vaera vae. Tumpa co jae meteño —jei Jesús—.

⁴⁵ Agüiye peñemongueta che ayu pomboeco vaera cheRu jóvai. Echa Moisés oicuatía vae co pemboeco, yepe tei pe reta pere: “Ore royapo Moisés oicuatía vae rupi. Jae rambue icavita oreve”. Jorai pere tei —jei—.

⁴⁶ Echa Moisés oicuatía vae perovia yave, chereroviata tei co. Echa Moisés oicuatía vae chemombeu —jei—.

⁴⁷ Erei mbaeti perovia Moisés oicuatía vae rambue, ngaraa vi perovia cheñee —jei Jesús chupe reta.

6

Jesús omongaru cinco mil

¹ Cuae jaicue rupi Jesús ojo ovae i guasu Galilea jovaicho pe. Jocuae i guasu jee vi Tiberias.

² Jare tenonde yave Jesús ombogüera amogüe imbaerasi vae reta, jare jeta yae vae oecha ma miacañi Jesús oyapo vae reta. Jae rambue añave cuae reta yogüiraja Jesús jaicue.

³ Jayave Jesús ojo oyeupi iviti re jare oguapi joco pe jemimboe reta ndive.

⁴ Jare coiño ma ou judío reta iyarete pascua jee vae iara.

⁵ Jare Jesús omae yave, oecha jeta yae vae yogüeru icoti. Jayave oparandu Felipe pe:

—¿Quiape pa ñandepuereta yagua mbiyape cuae reta jou vaera? —jei.

⁶ Jare cuae Jesús jei oicuaa vaera mbae ra jeita Felipe. Echa Jesús oicuaa ma mbae oyapota vae.

⁷ Felipe jei chupe:

—Doscientos denario pegua mbiyape ngaraa oupiti cuae reta jou vaera, metei ñavo mbovño jou yave.

⁸ Metei Jesús jemimboe Andrés jee vae - jae co Simón Pedro tiví - jei Jesús pe:

⁹ —Oime cuae pe oi metei cunumi cinco mbiyape jare mócoi jevae i rupigua güñoi vae. Erei jocuae mbovi yae co cuae jeta yae vae jou vaera —jei.

¹⁰ —Pemombeu chupe reta uguapi vaera —jei Jesús.

Jare jeta capiata oi joco pe. Jayave uguapi reta. Jare cuimbae reta cinco mil rupi ñogüñoi.

¹¹ Jayave Jesús oipii jocuae mbiyape jare omee yasoropai Tumpa pe. Jayave ome mbiyape jemimboe reta pe, jare jemimboe reta ome uguapi vae reta pe. Jae ramiño vi ome jevae i rupigua chupe reta. Jare opaete vae jou jare jivata.

¹² Jayave jivata reta ma yave, Jesús jei jemimboe reta pe:

—Pemboati tembíu oñepisaegüe jembire vae, agüiye vaera mbae oñemombo —jei.

¹³ Echa jocuae cinco mbiyape güi jembire mbiyape oñepisaegüe jare oyeeya joco pe, opa ma ocaru reta yave. Jayave Jesús jemimboe reta omboati jare omotinie doce canasta.

¹⁴ Jare joco pe ñogüñoi vae reta oecha ma yave cuae miacañi Jesús oyapo vae, jei reta:

—Cuae cuimbae jocuae Tumpa iñee omombeu vae etei co. Echa Tumpa iñee pe oyecuatía oi outa co ivi pe —jei reta.

¹⁵ Jare Jesús oicuaa yogüeruta oipii oyapo vaera juvicha guasura, yepe tei jae mbaeti oipota. Jayave ojo chugüi reta iviti re. Jaeiño ojo.

Jesús oguata i iárambue

¹⁶ Jare caaru yae ma yave, Jesús jemimboe reta ogüeyi yogüiraja i guasu pe.

¹⁷ Joco pe oyeupi chalana pe jare omboipi oasa i guasu rupi Capernaum coti. Pitumimbi ma oi, jare Jesús mbaetiño ou jae reta ñogüinoia pe.

¹⁸ Jayave tanta oyepeyu ivitu jare iaparúa tuicha yae ma.

¹⁹ Güiroata reta ma yave chalana metei legua rupi ndipo, oecha Jesús oguata ou i iárambue jare ou coiño ma chalana güi. Jayave oquiye reta.

²⁰ Erei Jesús jei chupe reta:

—Che co. Agüiye pequiye —jei.

²¹ Jayave oyerovia reve jae reta omboyeupi Jesús chalana pe, jare jupiveiño chalana ojo ovae ivi pe oipota yogüiraja ovaea pe.

Oeca reta Jesús

²² Piareve pe jeta yae vae jecuaeño opita i guasu jovaicho pe. Oecha meteiño chalana joco pe oi ndei Jesús jemimboe reta yogüiraja pipe mbove. Jare oicuaa Jesús mbaeti ojo chalana pe jemimboe reta ndive.

²³ Erei iru chalana tenta Tiberias güi yogüeru vae reta opita coiño ocaru ñogüinoia güi. Echa joco pe jae reta jou mbiyape ñandeYa omee güire yasoropai Tumpa pe.

²⁴ Oicuaa reta ma Jesús jare jemimboe reta mbaeti joco pe ñogüinoi. Jayave oyeupi reta jocuae chalana reta pe jare yogüiraja Capernaum coti, Jesús oeca vaera.

Mbiyape tecove omeeta vae

²⁵ I guasu oasa reta ma yave, ovae Jesús jare jei reta chupe:

—Rabí, ¿quirai yave pa reyu cuae pe?

²⁶ Jayave Jesús jei chupe reta: —Añete che jae peve, pe reta chereca jocuae mbiyape pemoivata vae jeco peguaño, mbaeti chereca jocuae miacañi pe aipota aicuauca peve vae jeco pegua —jei—.

²⁷ Agüiye peparaviqui perembiura mbaeti ima ondurata vae jeco peguaño. Erei peparaviqui perembiura ameeta peve vae jeco pegua. Che ayeapo cuimbaera vae ameeta peve perembiura ima yae ondurata vae. Echa penoita tecove opa mbae vae. Echa cheRu Tumpa oicuauca ma peve chepuere ayapo jocorai —jei Jesús chupe reta.

²⁸ Jayave oparandu reta Jesús pe:

—¿Mbae pa royapota? ¿Quirai pa orepuere royapo mbaraviqui Tumpa oipota royapo vaera vae? —jei reta.

²⁹ Jayave Jesús jei:

—Perovia cheré. Cuae co mbaraviqui Tumpa oipota peyapo vaera vae. Echa jae chembou —jei.

³⁰ Jayave jei reta chupe:

—¿Mbae nunga miacañi pa reyapota, roecha vaera jare rogüirovia vaera nderé? ¿Mbae nunga mbaraviqui pa reyapota nde? —jei reta—.

³¹ Ñanetenondegua reta jou maná ñuu pe. Echa Tumpa iñee pe oyecuatía oi: “Omee chupe reta jembiura ara güi jou reta vaera” —jei reta chupe.

³² —Añete che jae peve —jei Jesús —, Moisés mbaeti co omee jembiura ara güi ou vae. Añave cheRu omeeta peve perembiura añetete vae ara güi ou vae —jei—.

³³ Echa tembíu Tumpa añave omeeta vae jocuae ara güi ou vae co. Jae omeeta tecove ivi pegua reta pe —jei.

³⁴ —Carai —jei reta—, jecuaeño emee oreve cuae nunga orerembiura.

³⁵ —Che co jae jocuae tembíu tecove omeeta vae —jei Jesús—. Oipotagüe cheré güirovia vae ngaraa ñimbíai, jare oipotagüe cheré güirovia vae ngaraa iyúe —jei—.

³⁶ Erei che jae ma peve corai: Mbaeti perovia, yepe tei cherecha ma.

³⁷ Opaete cheRu omee cheve vae reta güiroviata co cheré —jei—, jare oipotagüe cheré güirovia vae ngaraa amombo.

³⁸ Echa agüeyi ayu ara güi ayapo vaera chembou vae jemimbota. Mbaeti ayu cheremimbota aeño ayapo vaera —jei Jesús—.

³⁹ Ngaraa amocañi metei ave opaete cheRu omee ma cheve vae reta güi. Echa amoingove yeta aru omanogüe vae reta ipite güi ara taicuegua pe. Cuae oipota chembou vae —jei—.

⁴⁰ Oipotagüe cherecha vae güinoita tecove opa mbae vae cheré güirovia yave, jare che amoingove yeta aru omanogüe vae reta ipite güi ara taicuegua pe. Cuae oipota cheRu —jei Jesús.

⁴¹ Jayave judío reta ñeenguru oyoupe. Echa Jesús jei ma: “Che co jae tembíu ara güi ou vae”.

⁴² Jare judío reta jei:

—Cuae co jae Jesús. Jae co José tai. Yaicuaa co tu jare ichi. ¿Quirai pa ipuere jei “Agüeyi ayu ara güi”? —jei reta.

⁴³ Jayave Jesús jei chupe reta:

—Agüiye peñeenguru oyoupe checoti.

⁴⁴ CheRu chembou —jei—. CheRu güiroviauca cheré vaeño ipuere güirovia cheré. Jare che amoingove yeta aru omanogüe vae reta ipite güi ara taicuegua pe —jei chupe reta—.

⁴⁵ Tumpa iñee aracae omombeu vae oicuatía corai: “Jare Tumpa omboeta opaete vae”. Jorai oicuatía —jei—. Oipotagüe oyeapisaca Tumpa re jare oñemboe Tumpa jei chupe vae re vae outa cheve —jei—.

⁴⁶ Mbaeti quia oecha cheRu, jaeño che ayu Tumpa güi vae. Che aecha ma co cheRu —jei Jesús

—.
⁴⁷ Añete che jae peve, cheré güirovia vae güinoi tecove opa mbae vae.

⁴⁸ Che co jae jocuae tembú tecove omee vae —jei—.

⁴⁹ Petenondegua reta jou jocuae maná ñuu pe jare omano reta ma.

⁵⁰ Che co jae tembú ara güi ou vae. Cuae tembú jou vae ngaraa omano —jei—.

⁵¹ Che co jae tembú tecove omee vae. Che agüeyi ayu ara güi. Oipotagüe cuae tembú jou vae güinoita tecove opa mbae vae —jei Jesús chupe reta—. Jare jocuae tembú ameeta vae cherete co. Ameeta cherete ivi pegua reta güinoi vaera tecove —jei.

⁵² Jayave judío reta oyoaca oyoupi.

—¿Quiraita ra ipuere cuae cuimbae omee ñandeve jete yau vaera? —jei reta.

⁵³ —Añete che jae peve —jei Jesús chupe reta—, mbaeti yave peu cherete jare cherugüi, ngaraa

tecove opa mbae vae penoi. Che co jae cuimbaera oyeapo vae —jei—.

⁵⁴ Cherete jare cherugüi jou vae güinoi tecove opa mbae vae, jare amoingove yeta aru omanogüe vae reta ipite güi ara taicuegua pe —jei—.

⁵⁵ Echa cherete jare cherugüi tembúu añetete vae co —jei Jesús—.

⁵⁶ Cherete jare cherugüi jou vae oico che ndive jare che aico jae ndive —jei—.

⁵⁷ CheRu güinoi tecove opa mbae vae jare jae chembou, jare che anoi tecove opa mbae vae cheRu güi. Jae ramiño vi jocuae cherete jou vae güinoita tecove opa mbae vae chegüi —jei chupe reta—.

⁵⁸ Che co jae tembúu ara güi ou vae. Cuae tembúu mbaeti co jocuae tembúu petenondegua reta jou vae rami. Echa jae reta omano. Erei oipotagüe cuae tembúu jou vae güinoita tecove opa mbae vae —jei.

⁵⁹ Jocorai jei Jesús judío reta itupao pe, Capernaum pe oporomboe oi yave.

Ñee reta tecove opa mbae vae pegua

⁶⁰ Cuae oendu reta yave, jeta Jesús jemimboe reta jei oyoupe:

—Mbaeti co icavi cuae jei vae. Agüiye yayeapisaca cuae nunga ñee re —jei reta.

⁶¹ Jesús oicuaa jemimboe reta ñeenguru co icoti. Jayave jei chupe reta:

—¿Maera pa peñeenguru checoti cuae re?

⁶² ¿Mbae pa peyapota cherecha yave ayeupi aja tenonde aicoa pe? Che co jae cuimbaera oyeapo vae —jei—.

⁶³ Jaeño Espíritu Santo ipuere omee tecove opa mbae vae. Ñanderete mbaeti ipuere omee ñandevae cuae nunga tecove. Cuae amombeu ma peve vae mbaeti co ivi peguaño. Jae co tecove opa mbae vae pegua —jei Jesús—.

⁶⁴ Erei amogüe pe reta mbaeti perovia cheré —jei.

Echa Jesús oicuaa iyipi güive quia reta mbaeti güirovia jese jare quia omoeterengata jovaicho reta pe.

⁶⁵ Jayave jei ye chupe reta:

—Jae rambue amombeu ma peve quirai cheRu güiroviauca cheré vaeño ipuere güirovia cheré —jei.

⁶⁶ Cuae jaicue rupi jeta jemimboe reta yogüiraja ye Jesús güi, jare mbaeti ye yogüiraja jae ndive.

⁶⁷ Jayave Jesús oparandu jocuae doce vae reta pe:

—¿Peota pa chegüi pe reta vi?

⁶⁸ —¿Quia nunga coti pa rojota, oreYa? —jei Simón Pedro chupe—. Nde co remombeu oreve tecove opa mbae vae regua.

⁶⁹ Jare rogüirovia ma nderé jare roicuaa ma nde co jae Tumpa oñono tee iyeupeguara vae —jei.

⁷⁰ Jayave Jesús jei:

—Che poparavo. Pe reta co doce. Jare metei pepite pe oi vae oyeócuai aña guasu pe —jei.

⁷¹ Corai imiari Judas re. Judas co jae Simón Iscariote tai. Echa Jesús oiparavo doce jare jae reta güi metei co jae Judas. Judas omoeterengata Jesús jovaicho reta pe.

7

Jesús tiví reta mbaeti güirovia jese

¹ Cuae jaicue rupi Jesús ojo tenta Galilea pegua reta pe. Mbaeti ojo Judea pe. Echa judío reta oipota oyuca.

² Jare outa ma ovae judío reta iyarete tabernáculos jee vae iara.

³ Jayave Jesús tiví reta jei chupe:

—Ecuá cuae güi Judea pe, neremimboe reta oecha vaera mbaraviqui reyapo vae.

⁴ Echa oime yave quia oipota iru vae reta oicuaa cavi vaera jesequa vae, mbaeti oyapo viari iparaviqui. Reyapo co cuae mbaraviqui. Jae ram-bue eyapo opaete vae jovaque —jei reta chupe.

⁵ Echa tiví reta vi mbaeti güirovia jese.

⁶ Jayave Jesús jei chupe reta:

—Ndei ovae jorai ayapo vaera, erei jecuaño pe reta pepuere peyapo peparaviqui —jei—.

⁷ Ivi pegua reta mbaeti ipuere pemotarei, erei ivi pegua reta chemotarei. Echa che amombeu chupe reta icavi mbae vae co jae oyapo reta vae —jei Jesús —.

⁸ Pe reta pecua arete pe. Che ndei rani ajata cuae arete pe. Echa ndei ovae che aja joco pe vaera —jei.

⁹ Jorai jei chupe reta Jesús, jare opita Galilea pe.

Arete tabernáculos jee vae

¹⁰ Cuae jaicue rupi tiví reta yogüiraja ma yave arete pe, Jesús vi ojo. Mbaeti ojo jeta vae jupie agüiye vaera oecha reta.

¹¹ Jare judío reta oeca ñogüinoi Jesús arete pe.

—¿Quiape pa oime oi? —jei reta.

12 Jare joco pe ñogüinoi vae reta oyoaca yae oyoupi Jesús re. Amogüe vae jei:

—Cuimbae jecocavi vae co jae.

Iru vae reta jei:

—Mbaeti co jecocavi. Oporombotavi vae co.

13 Erei opaete vae oquíye judío reta güi. Jae rambue imiari viariño.

14 Arete mbite ma yave, Jesús ojo Tumpa jo pe omboipi oporomboe.

15 Jare judío reta ipiacañi.

—¿Quirai ra jeta oicuaa cuae cuimbae mbaeti mbaembae re oñemboe vae? —jei reta.

16 Jayave Jesús jei chupe reta:

—Cheporomboe mbaeti co chembae aeño. Jae co chembou vae iporomboe —jei—.

17 Oipotagüe Tumpa jemimbota oipota oyapo vae oicuaata cheporomboe Tumpa iporomboe co. Oicuaata mbaeti co chembae aeño —jei—.

18 Oipotagüe vae iporomboe imbae aeño yave, jae oipota iru vae reta omboete vaera. Erei oporomboe vae oipota yave iru vae reta omboete vaera ombou vae, jae oporomboe añete vae re. Mbaeti co iyapu —jei Jesús—.

19 Moisés omee peve mboroócuai. Erei mbaeti metei ave pe reta peyapo mboroócuai pe oyecuatía oi vae rupi —jei—. ¿Maera pa peipota cheyuca? —jei chupe reta.

20 Jayave judío reta jei:

—Aña oya ma nderé. ¿Quía pa oipota ndeyuca? —jei reta.

21 —Ayapo ma metei mbaraviqui —jei Jesús—, jare opaete pe reta pepiacañi jese.

²² Moisés omombeu peve peñemocircuncidauca vaera. Erei mbaeti oñemboipĩ Moisés omombeu yave. Echa Moisés itenondegua reta oyapo joco-rai. Jare pe reta peporomocircuncidauca mbutuu iara pe —jei—.

²³ Che ambogüera ma metei cuimbae mbutuu iara pe. Opaete jete ocuera cavi ma. ¿Maera pa pepochi cheve cuae jeco pegua? Echa pe reta peporomocircuncidauca mbutuu iara pe mboroócuai Moisés omombeu peve vae mbaeti peipota peyavi rambue —jei Jesús—.

²⁴ Agüiye peporojaa peecha vae rupiño. Peporojaa cavi jupi vae rupi —jei.

¿Jae pa co Cristo?

²⁵ Jae rambue amogüe Jerusalén pegua reta jei:

—¿Jaea ra cuae judío reta oipota oyuca vae?

²⁶ Mase, co oi cuae pe, jare imiari oi opaete vae pe. Erei mbaeti quia mbae jei chupe. Güiramoĩ ñanderuvicha reta oicuaa ma jae co Cristo —jei reta—.

²⁷ Erei yaicuaa queti güi ou cuae cuimbae. Echa Cristo oyecuaa yave, ngaraa quia oicuaa queti güi ou —jei reta.

²⁸ Jae rambue Jesús oporomboe oi rambueve Tumpa jo pe, iñeata reve jei:

—Pe reta checuaa co, jare peicuaa co queti güi ayu. Erei mbaeti ayu cheremimbota rupiño. Echa chembou vae imiari añete vae re, jare pe reta mbaeti peicuaa chembou vae —jei—.

²⁹ Erei che aicuaa. Echa ayu jae oia güi. Jae chembou —jei.

³⁰ Jae rambue judío reta oipota tei oipii. Erei mbaeti quia oipii. Echa ndei ovae oyepii vaera.

³¹ Jare jeta joco pe ñogüinoi vae güirovia jese. Echa jei reta:

—Cristo ou yave, ¿oyapota ra jeta yae miacañi cuae cuimbae oyapo vae güi?

Fariseo reta ombou jembíocuai reta oipii vaera Jesús

³² Jare fariseo reta oendu jeta vae iñeenguru ñogüinoi Jesús re. Jayave sacerdote reta itenondegua reta jare fariseo reta ombou jembíocuai reta oipii vaera Jesús.

³³ Jayave Jesús jei:

—Aita pe reta ndive michi peguaño. Jayave ajata chembou vae piri.

³⁴ Cherecata co, erei ngaraa chevae. Ngaraa peo che aita pe —jei.

³⁵ Jayave judío reta jei oyoupe:

—¿Queti ra ojota cuae cuimbae agüiye vaera ñavae chupe? Ojota ndipo judío reta judío mbae vae reta ipite rupi oñemoai vae piri. Omboeta ndipo judío mbae vae reta.

³⁶ ¿Mbae ra oipota jei, imiari yave corai: “Cherecata co, erei ngaraa chevae. Ngaraa peo che aita pe”? —jei reta.

I tecove ome vae

³⁷ Jocuae ara arete opata yave icavi yae opaete iru arete iara reta güi. Jayave Jesús oñemboi jare iñeata reve jei:

—Oime yave quia iyúe vae tou cheve toiu —jei—.

³⁸ Cheré güirovia vae güi osirita jeta i tecove ome vae. Jorai Tumpa iñe pe oyecuatía oi —jei.

³⁹ Jocrari imiari Jesús Espíritu Santo re. Oipota jei omeeta Espíritu Santo güirovia jese vae reta pe. Echa ndei omee Espíritu Santo. Echa Jesús ndei ojo ye ara pe.

Yati vae reta oyoaca oyoupi

⁴⁰ Cuae oendu yave, amogüe joco pe ñogüinoi vae jei:

—Cuae cuimbae jocuae Tumpa iñee omombeu vae etei co.

⁴¹ Iru vae reta jei:

—Cuae cuimbae Cristo co.

Erei amogüe vae jei:

—¿Galilea pegua ra Cristo?

⁴² Echa Tumpa iñee pe oyecuatía oi Cristo co jae David iñemoña reta pegua jare Belén pegua co. Echa David joco pegua co —jei reta.

⁴³ Jesús jei chupe reta vae jeco pegua, joco pe ñogüinoi vae reta oyoaca oyoupi.

⁴⁴ Jare amogüe vae oipota tei oip# Jesús, erei mbaeti quia oip#.

Mbaeti etei quia imiari jocrari

⁴⁵ Jayave tembiócuai sacerdote reta itenondegua reta jare fariseo reta ombou vae reta yogüiraja ye chupe reta. Jayave sacerdote reta itenondegua reta jare fariseo reta jei jembiócuai reta pe:

—¿Maera pa mbaeti peru?

⁴⁶ Jembiócuai reta jei:

—Echa mbaeti etei quia imiari jocuae cuimbae imiari rami.

⁴⁷ Jayave fariseo reta jei:

—¿Peñembotavi ma pa pe reta vi?

48 ¿Güirovia ma ra jese mburuvicha reta jare fariseo reta? Mbaeti metei ave —jei reta—.

49 Erei cuae jeta vae mbaeti oicuaa mboroócuai pe oyecuatía oi vae. Tumpa oiporaraucata co chupe reta —jei reta.

50 Jayave metei jae reta ipite pe oi vae jei iru reta pe - jae co Nicodemo jee vae - tenonde yave jae ojo opou Jesús piri pitu yave:

51 —Mboroócuai pe oyecuatía oi vae rupi mbaeti ñandepuere ñajaa oipotagüe vae ndei yayeapisaca jese mbove. Echa yayeapisaca jese yave, yaicuaa mbae oyapo vae —jei.

52 Iru reta jei chupe:

—¿Nde vi ra Galilea pegua? Reeca yave, reicuaata mbaeti co metei ave Tumpa iñee omombeu vae Galilea pegua —jei reta.

Cuña menda re oñuvanga vae

53 Jayave opaete vae yogüiraja jo ae pe.

8

1 Erei Jesús ojo iviti Oliva jee vae pe.

2 Piareve pe neimbove asi Jesús ojo ye Tumpa jo pe. Jayave jeta vae yogüeru jae oia pe, jare jae oguapi omboe reta oi.

3 Jayave mboroócuai re oporomboe vae reta jare fariseo reta güeru metei cuña. Oipocou reta cuña menda re oñuvanga oi yave. Jayave oñono reta joco pe ñogüinoi vae reta jenonde.

4 —Oporomboe vae —jei reta Jesús pe—, cuae cuña roipocou menda re oñuvanga oi yave.

⁵ Mboroócuai pe Moisés ñandeócuai yayuca vaera cuae nunga cuña ita pe. ¿Mbae pa rere nde cuae re? —jei reta.

⁶ Cuae jei reta oicuaa vaera mbae ra jeita Jesús. Echa oipota omboeco. Jayave Jesús oñaivi jare oicuatía mbae ivi re ipoaca pe.

⁷ Jecuaecuae oparandu reta chupe cuae re. Jayave Jesús oñemboi jare jei chupe reta:

—Mbaeti mbaeyoa güinoi pepite pe vae rani toyapi ita pe.

⁸ Jayave oñaivi ye jare oicuatía ye mbae ivi re ipoaca pe.

⁹ Erei cuae oendu reta yave, ipia ñavo omboeco jeco re jare yogüiraja joco güi meteitei pe. Tenonde yogüiraja indechi vae reta. Jayave opaete vae yogüiraja. Jaeño Jesús opita joco pe cuña jae jóvai oñemboi oi vae ndive.

¹⁰ Jayave Jesús oñemboi ye omae jese, jare jei:

—¿Jama pa jocuae cuimbae reta, cuña? ¿Mbaeti ma pa quia nemboeco?

¹¹ —Mbaeti co quia, carai —jei cuña chupe.

Jayave Jesús jei:

—Che vi mbaeti romboeco. Ecuá, agüiye ye eyapo jocuae mbaeyoa —jei.

Jesús co metei tembipe rami

¹² Cuae jaicue rupi Jesús jei yati vae reta pe:

—Che co jae metei tembipe rami. Ayu co ivi pegua reta oecha cavi vaera. Oico che ndive vae ngaraa oguata pitumimbi pe. Echa güinoita tecove ipuere vaera oecha cavi —jei.

¹³ Jayave fariseo reta jei Jesús pe:

—Remombeu oreve vae ngaraa rogüirovia. Echa nde nemiari ndeyee —jei reta.

¹⁴ —Amombeu ma peve vae pepuere perovia, yepe tei chemiari peve cheyee —jei Jesús—. Echa che aicuaa co queti güi ayu jare queti aja. Erei pe reta mbaeti peicuaa queti güi ayu jare queti aja.

¹⁵ Pe reta peporojaa opaete ivi pegua reta oporojaa rami. Che mbaeti quia ajaa —jei—.

¹⁶ Erei aporojaa yave, aporojaa añete vae rupi. Echa cheRu chembou. Jare che jare cheRu roporojaa - mbaeti che aeiño —jei—.

¹⁷ Peporoócuai pe oyecuatía oi corai: “Mócoi jeigüe oyovaque yave, peroviata co”. Jocrai oyecuatía oi —jei—.

¹⁸ Chemiari peve cheyee jare cheRu chemombeu peve - jae co chembou —jei.

¹⁹ Jayave judío reta jei:

—¿Jama pa ndeRu?

—Pe reta mbaeti checuaa jare mbaeti peicuaa cheRu —jei Jesús chupe reta—. Checuaa yave mona, cheRu vi peicuaata tei co —jei.

²⁰ Cuae jei Jesús Tumpa jo pe corepoti Tumpa pegua jiru reta ñogüinoia pe. Echa joco pe oporomböe. Erei mbaeti quia oipii. Echa ndei ovae oyepii vaera.

Pe reta ngaraa pepuere peo che ajataa pe

²¹ Jare Jesús jei ye chupe reta:

—Ajata ma cuae güi. Pe reta cherecata co, erei pemanota pemaeyoa oñemboai mbae reve. Pe reta ngaraa pepuere peo che ajataa pe —jei.

²² —¿Oyeyucata ra? —jei judío reta—. Echa jei ma: “Pe reta ngaraa pepuere peo che ajataa pe”.

23 Jayave Jesús jei:

—Pe reta ivi pegua reta co, erei che ara pegua co. Pe reta ivi pegua reta co, erei che mbaeti co cuae ivi pegua.

24 Amombeu ma peve pemanota pembaeyoa oñemboai mbae reve. Echa pemanota co pembaeyoa oñemboai mbae reve, mbaeti yave perovia che co jae —jei.

25 Jayave jei reta Jesús pe:

—¿Quía pa co nde?

—Jocuae tenonde güive amombeu ma peve vae —jei Jesús—.

26 Jeta mbaembae re chepuere chemiari peré jare jeta mbae re chepuere pojaa. Erei chembou vae imiari añete vae re, jare amombeu ivi pegua reta pe chembou vae omombeu cheve vae —jei.

27 Jae reta mbaeti oicuaa Jesús imiari chupe reta Tu ara pe oi vae re.

28 Jayave Jesús jei:

—Pe reta chereupi ma yave - che ayeapo cuimbaera vae - peicuaata che co jae. Mbaeti mbae ayapo cheremimbota rupiño. CheRu omombeu cheve vae rupiño chemiari —jei—.

29 Jare chembou vae oico che ndive. Mbaeti chereya cheiño aico vaera. Echa jecuaño ayapo jae oipota vae rupi —jei.

30 Jare jorai Jesús imiari yave, jeta vae güirovia jese.

Añete vae peyorata co

31 Jayave Jesús jei jocuae judío güirovia jese vae reta pe:

—Jecuaeño peyapo yave che jae peve peyapo vaera vae, peicota co cheremimboe añetete vae retara.

³² Jare peicuaata añete vae, jare añete vae peyorata co —jei.

³³ Judío reta jei chupe:

—Abraham iñemoña reta co ore. Mbaeti etei royeócuai quia pe. ¿Maera pa rere royeyorata co? —jei reta.

³⁴ —Añete che jae peve —jei Jesús—, iyoa vae oyeócuai oi mbaeyoa pe.

³⁵ Oyeócuai vae mbaeti jecuaeño opita o pe. Erei o iya tai jecuaeño opita —jei—.

³⁶ Che co jae Tumpa Tai. Che poyora yave mbaeyoa güi, peyeyora eteta co —jei—.

³⁷ Che aicuaa Abraham iñemoña reta co pe reta. Erei peipota cheyuca, mbaeti peipota peyapo che jae peve peyapo vaera vae rambue —jei—.

³⁸ Chemiari peve cheRu ndive aico yave aecha vae re, jare pe reta peyapo peru omombeu peve peyapo vaera vae rupi —jei Jesús.

Aña guasu co jae peru

³⁹ —Abraham co jae oreru —jei reta.

—Pe reta Abraham tai reta añetete vae yave mona —jei Jesús—, peyapota tei co Abraham oyapo vae rami.

⁴⁰ Erei añave peipota cheyuca, yepe tei amombeu ma peve añete vae. Jae co Tumpa omombeu cheve vae. Mbaeti corai oyapo Abraham —jei—.

⁴¹ Pe reta peyapo pei peru iparaviqui —jei Jesús chupe reta.

—Mbaeti co oremoñemoña aguasa pe oreru reta —jei reta—. Tumpaño co jae oreRu.

⁴² Jayave Jesús jei chupe reta:

—Tumpa co jae peRu yave mona, pe reta cherañuta tei co. Echa che ayu Tumpa güi. Che Tumpa pegua co. Mbaeti che aipota rambueño ayu. Jae co chembou —jei—.

⁴³ ¿Maera pa mbaeti peicuaa amombeu peve vae? Mbaeti peipota peyeapisaca cheñee re. Jae rambue mbaeti peicuaa —jei Jesús—.

⁴⁴ Aña guasu co jae peru, jare pe reta peipota peyapo peru oipota vae rupi. Peru jecuaeño oporoyuca oico, jare mbaeti etei oyapo añete vae rupi. Echa mbaeti etei añete vae pegua. Jae co aña guasu. Jae rambue jecuaeño iyapu. Echa jae co iyapu vae jare omboe ivi pegua reta iyapu vaera —jei—.

⁴⁵ Erei pe reta mbaeti chererovia, añete vae amombeu peve rambue —jei—.

⁴⁶ Mbaeti metei yepe pepuere pere cheve: “Ndeyoa co”. Echa che amombeu peve añete vae. ¿Maera pa mbaeti chererovia? —jei—.

⁴⁷ Tumpa tai reta oyeapisaca Tumpa iñee re. Pe reta mbaeti co Tumpa tai reta. Jae rambue mbaeti peyeapisaca jese —jei—.

Cristo jecuaeño oico

⁴⁸ Jayave judío reta jei:

—Roe ma nde co jae metei Samaria pegua, jare aña oya ma nderé. Añete co cuae roe vae —jei reta.

⁴⁹ —Mbaeti co oya cheré aña —jei Jesús—. Che amboete ai cheRu, erei pe reta chereroiro.

⁵⁰ Erei mbaeti aipota ivi pegua reta chemboete vaera. Oime co quia oipota chemboeteuca vae. Jae oporojaata co —jei Jesús—.

⁵¹ Añete che jae peve, oyapo che jae chupe oyapo vaera vae ngaraa omano —jei.

⁵² Jayave judío reta jei Jesús pe:

—Añave roicuaa ma ñña oya co nderé. Abraham jare Tumpa ññee aracae omombeu vae reta omano. Erei nde rere: “Oyapo che jae chupe oyapo vaera vae ngaraa omano”.

⁵³ ¿Tuicha yae pa nembraepuere ññanetenondegua Abraham imbraepuere güi? Echa Abraham omano. Jae ramiño vi Tumpa ññee aracae omombeu vae reta omano. ¿Quia pa co nde? ¿Mbae pa rere ndeyee? —jei reta Jesús pe.

⁵⁴ —Mbaeti etei añemboete —jei Jesús—. Echa jocorai ayapo yave, jocuae nunga maemboete mbaeti co mbae. Erei cheRu chemboeteuca, jare pe reta pere Tumpa co jae peRu —jei—.

⁵⁵ Erei pe reta mbaeti peicuaa Tumpa. Che aicuaa co. Che jae yave: “Mbaeti aicuaa”, cheaputa tei co pe reta peapu rami. Erei aicuaa co, jare ayapo jei cheve ayapo vaera vae —jei—.

⁵⁶ Petenondegua Abraham oyerovia cherechata rambue. Cherecha co jare oyerovia —jei.

⁵⁷ Jayave judío reta jei chupe: —Nde ndei renoi cincuenta año. ¿Quirai pa ndepuere rere reecha co Abraham? —jei reta.

⁵⁸ —Añete che jae peve —jei Jesús—, ndei Abraham oico mbove, che jecuaeño mai aico —jei.

⁵⁹ Jayave judío reta omonoo ita reta oyapi vaera tei pipe Jesús. Erei Jesús oasa jae reta ipite rupi oe Tumpa jo güi, jare jae reta mbaeti ma oecha.

9

Jesús ombogüera jesa mbae vae

¹ Jare Jesús oasa ojo yave, oecha metei cuimbae jesa mbae vae. Cuae cuimbae jocorai oico ichi güi oa güive.

² Jayave Jesús jemimboe reta oparandu Jesús pe:
—Rabí, ¿quia pa iyoa, ichi güi oa vaera jesa mbae? ¿Iyoa pa jae etei? ¿Iyoa pa tu jare ichi? —jei reta.

³ —Mbaeti jae imbaeyoa jeco pegua jare mbaeti tu jare ichi imbaeyoa jeco pegua corai oi —jei Jesús —. Corai oi Tumpa imbaepuere oyecuaa vaera ocuera yave —jei—.

⁴ Icavi co ayapo vaera ara rupi chembou vae iparaviqui. Echa ara rupi ñanoi tembipe. Erei outa pítu, jare pítu yave mbaeti quia ipuere oparaviqui —jei—.

⁵ Cuae ivi pe aico rambueve, che co jae metei tembipe rami. Ayu co ivi pegua reta oecha cavi vaera —jei.

⁶ Cuae jei ma yave, ondivi ivi re jare jocuae güi oyapo tuyuapo. Jayave oñono tuyuapo cuimbae jesa re.

⁷ Jayave jei chupe:

—Ecuá eyoe nderesa i Siloé pe.

(Cuae Siloé oipota jei: Oñemondo.) Jayave cuimbae ojo oyoe jesa jare ou ye yave, omae ma.

⁸ Jayave cuimbae jenta pegua reta jare iru tenonde oecha oyerure oi corepoti re vae reta jei:

—¿Jaea ra cuae oguapi oyerure corepoti re vae?

⁹ Amogüe vae jei:

—Jae co.

Iru vae reta jei:

—Mbaeti co. Erei oguacatu vae co.

Erei cuimbae jei:

—Che etei co.

¹⁰ Jayave jei reta chupe:

—¿Quirai pa añave ndepuere remae?

¹¹ —Jocuae cuimbae Jesús jee vae oyapo tuyuapo oñono cheresa re —jei cuimbae chupe reta—. Jayave jei cheve: “Ecu Siloé pe eyoe nderesa” — jei cheve, jei—. Jae rambue aja ayoe cheresa, jare amae ma —jei.

¹² —¿Quiape pa oime oi? —jei reta.

—Mbaeti aicuaa —jei cuimbae chupe reta.

Fariseo reta oparandu cuimbae ocuera vae pe

¹³ Jayave jae reta güiraja fariseo ñogüinoia pe cuimbae tenonde yave jesa mbae vae.

¹⁴ Jare jocuae ara mbutuu iara co. Echa jocuae ara Jesús oyapo tuyuapo omomae vaera cuimbae.

¹⁵ Jayave fariseo reta vi oparandu cuimbae pe quirai ra ipuere omae.

—Oñono tuyuapo cheresa re —jei cuimbae—. Jayave ayoe cheresa, jare amae ma —jei.

¹⁶ Amogüe fariseo reta jei:

—Mbaeti co Tumpa pegua cuae cuimbae. Echa oyapo mbutuu iara pe mboroócuai pe jei agüiye yayapo vaera vae.

Erei iru fariseo reta jei:

—¿Quirai ra ipuere cuimbae iyoa vae oyapo cuae nunga miacañi?

Jare oyoaca reta oyoupi.

¹⁷ Jayave jei reta ye cuimbae tenonde yave jesa mbae vae pe:

—¿Mbae pa rere nde jocuae nemomae vae re?

—Jae co metei Tumpa iñee omombeu vae —jei chupe reta.

¹⁸ Judío reta mbaeti güirovia tenonde yave jesa mbae vae co jocuae cuimbae. Mbaeti güirovia vi jaeramo co omae. Jae rambue oeniuca cuimbae omae ma vae tu jare ichi.

¹⁹ Jayave oparandu reta tu jare ichi pe:

—¿Jae pa co cuae nderai jesa mbae co oa pere chupe vae? ¿Quirai pa añave omae?

²⁰ —Aicuaa jae co cheraí jesa mbae co oa ichi güi vae —jei chupe reta—.

²¹ Erei mbaeti roicuaa quirai ra añave omae. Mbaeti vi roicuaa quia ra omomae. Peparandu chupe. Echa ocuacuaa ma co jae. Jae etei ipuere omombeu peve —jei.

²² Jocorai jei cuimbae tu jare ichi, oquiye judío reta güi rambue. Echa judío reta jei ma oyoupe: “Jocuae Jesús co jae Cristo jei vae toñemombo ñandetupao güi”.

²³ Jae rambue tu jare ichi jei: “Ocuacuaa ma co jae. Peparandu chupe”.

²⁴ Jayave judío reta oeni ye cuimbae tenonde yave jesa mbae vae.

—Emboete Tumpa —jei reta chupe—. Echa roicuaa cuae cuimbae iyoa vae co.

²⁵ —Mbaeti aicuaa iyoa vae ra jae —jei cuimbae—. Erei cuae co aicuaa: Tenonde yave cheresa mbae vae co, erei añave amae.

²⁶ Jayave oparandu reta ye chupe:

—¿Mbae pa oyapo ndeve? ¿Quirai pa nemomae?

²⁷ —Amombeu ma peve —jei cuimbae—, erei mbaeti peipota peyeapisaca cheré. ¿Maera pa

peipota peendu ye? ¿Peipota pa pe reta vi peyeapo jemimboe retara? —jei.

²⁸ Jayave judío reta oñeengata cuimbae pe.

—Nde co jae jemimboe —jei reta—. Ore co jae Moisés jemimboe reta.

²⁹ Ore roicuaa Tumpa imiari co Moisés pe. Erei mbaeti roicuaa quia pegua ra cuae cuimbae —jei reta.

³⁰ —Cuae co metei miacañi —jei cuimbae—. Pe reta mbaeti peicuaa quia pegua ra. Erei jae chemomae.

³¹ Yaicuaa Tumpa mbaeti oyeapísaca iyoa vae reta re. Erei oime yave quia omboete Tumpa jare oyapo Tumpa jemimbota vae, Tumpa oyeapísaca jese —jei—.

³² Ivi oyeapo güive mbaeti etei ipuere quia omo-mae jesa mbae oa ichi güi vae —jei—.

³³ Mbaeti yave Tumpa pegua cuae cuimbae, mbaetita tei mbae ipuere oyapo —jei.

³⁴ Jayave judío reta jei chupe:

—Nde rea ndesi güi ndeyoa yae reve. Mbaeti mbae re ndepuere oremboe —jei reta.

Jayave omombo reta cuimbae.

Tumpa coti jesa mbae vae reta

³⁵ Jare Jesús oicuaa yave judío reta omombo ma cuimbae, ojo oeca. Jare ovae yave, jei chupe:

—¿Rerovia pa cuimbaera oyeapo vae re?

³⁶ —¿Quia pa co jae, carai? —jei Jesús pe—. Emombeu cheve, arovia vaera jese.

³⁷ —Reecha ma —jei Jesús chupe—. Che chemiari ai nde ndive vae jae co.

³⁸ —CheYa, arovia ma —jei cuimbae.

Jayave cuimbae oyeatıca Jesús jóvai jare omboete.

³⁹ Jayave Jesús jei:

—Ayu ivi pe amboyao vaera oyougüi ivi pegua reta. Ayu mbaeti ipuere omae vae reta omae vaera, jare ipuere omae vae reta agüıye vaera omae —jei.

⁴⁰ Amogüe fariseo joco pe ñogüinoi vae reta oendu cuae, jare oparandu chupe:

—¿Ore vi pa co jae mbaeti omae vae reta?

⁴¹ —Mbaeti pemae yave, mbaetita tei teco penoi —jei Jesús—. Ere pere ma: “Roma co”. Jae rambue teco penoi vıteri —jei.

10

Jesús omojaanga vecha-rocai

¹ —Añete che jae peve —jei Jesús —, imonda vae mbaeti oique taraquera rupi vecha-rocai pe. Oique ambué rupi. Echa oipota oñomi güiraja ambué vae ivecha reta —jei—.

² Erei vecha reta iñangarecoa oique taraquera rupi —jei—.

³ Jare vecha reta iñangarecoa oipota oique yave, taraquera jaroa oipea chupe. Jare vecha reta oendu iñangarecoa iñee. Echa iñangarecoa oeni vecha reta jee ñavo pe jare güiraja vecha-rocai güi —jei—.

⁴ Jare güiraja yave opaete imbae reta vecha-rocai güi, jae ojo tenonde jare vecha reta yogüiraja jaicue. Echa oicuaa iñee —jei—.

⁵ Ngaraa yogüiraja cuimbae mbaeti oicuaa vae jaicue. Otecuraita chugüi. Echa mbaetita oicuaa iñee —jei.

⁶ Cuae ñee omojaanga vae pe Jesús omboe reta tei, erei jae reta mbaeti oicuaa mbae re ra omojaanga cuae jei chupe reta vae.

Jesús co jae vecha reta ñangarecoa icavi vae rami

⁷ Jayave Jesús jei ye:

—Añete che jae peve, che co jae vecha-rocai itaraquera rami.

⁸ Amogüe vae yogüeru ndei ayu mbove. Erei vecha reta mbaeti oyapo jocuae reta jemimbota. Echa jocuae reta imonda vae reta co. Jae reta oipota güiraja ambué vae ivecha reta —jei—.

⁹ Che co jae taraquera rami. Che rupi vecharocai pe oique vae oñemboasaucata co. Oiqueta jare oeta jare ovaeta mbae jou vaera —jei Jesús—.

¹⁰ Imonda vae ou güiraja vaera ambué vae ivecha reta. Ou oyuca vaera vecha reta. Che ayu ivi pegua reta güinoi vaera tecove opa mbae vae, jare jocuae tecove güinoi yave oyerovia yaeta —jei—.

¹¹ Che co jae vecha reta ñangarecoa icavi vae rami. Echa vecha reta ñangarecoa icavi vae omano vecha reta oepi vaera —jei—.

¹² Jepi re vecha reta re oñangareco vae oecha yave aguarañaimba ou, oeya vecha reta jare otecurai. Echa mbaeti vecha reta ñangarecoa añetete vae, jare vecha reta mbaeti imbae —jei—.

¹³ Jayave aguarañaimba ou oipi amogüe vecha reta, jare iru vecha reta opa oñemoai. Jocuae cuimbae otecurai jepi re oñangareco vecha reta re rambue. Echa mbaeti ipiatiti vecha reta oiporara yave —jei—.

14 Che co jae vecha reta iñangarecoa icavi vae rami. Aicuaa chevecha reta jare chevecha reta checuaa —jei Jesús—.

15 Jocorai cheRu checuaa jare che aicuaa cheRu. Jare che amanota vecha reta aepi vaera —jei—.

16 Jare oime anoi iru vecha reta. Jae reta mbaeti co cuae nunga pegua. Jae reta vi aruta co. Jae reta vi oyeapisacata cheñee re. Jayave oimeta metei ati jare metei vecha reta iñangarecoa —jei—.

17 CheRu cheraïu amanota rambue. Amanota co, cherecove anoi ye vaera —jei—.

18 Mbaeti quia ipuere oequi chegüi cherecove. Amanota aipota rambue. Chepuere amoeterenga cherecove amano vaera, jare chepuere anoi ye. Corai cheócuai cheRu —jei.

19 Jesús cuae jei rambue, judío reta oyoaca ye oyoupi.

20 Jeta jae reta jei:

—Aña oya ma jese. Mbaeti ma oicuaa mbae jei. ¿Maera pa peyeapisaca jese?

21 Iru vae reta jei:

—Mbaeti quia aña oya jese vae ipuere imiari jocorai. Mbaeti etei ipuere aña omomae jesa mbae vae reta —jei reta.

Judío reta güiroiro Jesús

22 Iroi ma Jerusalén pe, jare judío reta oyapo ñogüinoi arete Tumpa jo oyetio vaera vae.

23 Jare Jesús oguata Tumpa jo pe oca Salomónjee vae rupi.

24 Jayave judío reta oñemboati Jesús iyipi rupi jare jei:

—¿Quirai yave pa remombeu cavita oreve, agüiye vaera orembojopa? Nde co jae Cristo yave, emombeu cavi oreve —jei reta.

²⁵ —Amombeu ma peve —jei Jesús—, erei mbaeti perovia cheñee. CheRu chembou cuae mbaraviqui ayapo vaera, jare cuae mbaraviqui oicuauca quia co che —jei—.

²⁶ Amombeu ma peve pe reta mbaeti co chevecha reta. Jae rambue mbaeti perovia cheré.

²⁷ Chevecha reta oyeapisaca cheñee re. Aicuaa chevecha reta, jare jae reta yogüiraja cheraicue —jei—.

²⁸ Jare amee chupe reta tecove opa mbae vae, jare ngaraa etei ojo cañitei pe. Mbaeti quia ipuere opiro chegüi —jei—.

²⁹ CheRu ome ma cheve cuae reta, jare cheRu imbaepuere tuicha yae opaete vae imbaepuere güi. Jare mbaeti quia ipuere opiro cheRu güi —jei—

³⁰ Che jare cheRu meteiño co —jei.

³¹ Jayave judío reta omonoo ye ita reta oyapi vaera tei pipe Jesús.

³² Jayave Jesús jei chupe reta:

—Aechauca ma peve jeta mbaraviqui icavi vae. Cuae ayapo cheRu imbaepuere rupi. ¿Mbae nunga mbaraviqui jeco pegua pa peipota cheapi ita pe? —jei.

³³ —Mbaeti metei mbaraviqui icavi vae jeco pegua —jei judío reta chupe—. Nde rere icavi mbae vae Tumpa coti. Jocuae jeco pegua roapita ita pe. Echa nde co jae metei cuimbaeño, erei rere ndeyeupe nde co jae Tumpa —jei reta.

³⁴ Jayave Jesús jei chupe reta:

—Mboroócuai penoi vae pe oyecuatía oi quirai Tumpa jei corai: “Pe reta co jae tumpa reta”. Jocorai jei.

³⁵ Echa Tumpa imiari chupe reta yave, jae etei ombojee tumpa reta. Jare Tumpa ñee pe oyecuatía oi vae jecuaeño añete co.

³⁶ Jae rambue ¿maera pa pere cheve: “Nde rere icavi mbae vae Tumpa coti”, che jae vae jeco pegua? Echa che jae: “Che co jae Tumpa Tai”. Echa Tumpa cheño tee cuae mbaraviqui ayapo vaera, jare jae chembou cuae ivi pe —jei—.

³⁷ Mbaeti yave mona ayapo cheRu iparaviqui, agüiyeta tei chererovia.

³⁸ Erei ayapo co cheRu iparaviqui. Jae rambue yepe tei mbaeti chererovia, perovia mbaraviqui ayapo vae cheRu pegua co, peicuaa vaera cheRu oico che ndive jare che aico cheRu ndive —jei.

³⁹ Jayave judío reta oipota ye tei oipñ Jesús, erei jae ojo chugüi reta.

⁴⁰ Jare Jesús ojo ye i Jordán jovaicho pe tenonde yave Juan oporombobautiza oia pe, jare opita joco pe.

⁴¹ Jare jeta vae yogüeru jae oia pe jare jei:

—Juan mbaeti oyapo metei ave miacañi. Erei opaete Juan jei cuae cuimbae re vae añete co —jei reta.

⁴² Jare jeta vae güirovia Jesús re joco pe.

11

Lázaro omano

¹ Metei cuimbae Lázaro jee vae imbaerasi oi. Jae jare María jare Marta - jae co María tique - Betania pegua reta co.

² Jocuæ María opiyere mbae ipiche cavi yae vae ñandeYa re jare oyoe ipi ia pe. Jocuæ Lázaro imbaerasi oi vae María iquivi co.

³ Jare Lázaro jeindi reta omondo omombeu vaera Jesús pe:

—OreYa imbaerasi oi cuæ reaïu vae.

⁴ Jesús cuæ oicuaa yave, jei:

—Cuæ imbaerasi ou chupe iru vae reta omboete vaera Tumpa. Mbaeti ou jae omano vaera. Echa che co jae Tumpa Tai, jare iru vae reta chemboeteta cuæ mbaerasi jeco pegua —jei.

⁵ Jesús oaiu Marta jare ipiquii jare Lázaro.

⁶ Erei oicuaa ma yave Lázaro imbaerasi oi, opitaño mócoi ara joco pe.

⁷ Cuæ jaicue rupi jei jemimboe reta pe:

—Yaja ye mo Judea pe.

⁸ —Rabí —jei reta—, ndei co ima judío reta oipota tei ndeapi ita pe joco pe. Jae rambue ¿maera pa reo yeta?

⁹ —Oime doce ora güinoi ara —jei Jesús—. Ara rupi uguata vae ngaraa ipi güirocua. Echa güinoi tembipe cuæ ivi pegua —jei—.

¹⁰ Erei pitu yave uguata vae ipi güirocua. Echa mbaeti güinoi tembipe.

¹¹ Jocrari jei Jesús. Jayave jei ye:

—Ñaneamingo Lázaro oque ma oi. Erei che ajata amoingove —jei.

¹² Jemimboe reta jei:

—OreYa, oque oi yave, ocuera yeta co.

¹³ Erei Jesús jocrari jei yave, oipota jei omano ma. Jae reta oñemongueta tei oipota jei oputuu co oque oi.

14 Jayave Jesús omombeu cavi chupe reta:

—Lázaro omano ma.

15 Jare ayerovia mbaeti joco pe ai vae re. Cuae icavita co peve. Echa perovia yaeta co. Yaja mo icoti —jei.

16 Jayave Tomás - jae co Chaguaqui pe oñemobojee vae - jei iru Jesús jemimboe reta pe:

—Yaja mo ñande vi, ñamano vaera jae ndive.

Jesús co jae tecove omee vae

17 Jare Jesús ou ovae yave, amogüe vae omombeu chupe irundi ara ma co Lázaro oi teogüeriru pe.

18 Betania coiño oi Jerusalén güi. Oupiti mboapi kilómetro rupi.

19 Jare jeta judío reta yogüeru ma Marta jare María piri ombopiácatu vaera iquivi amiri re.

20 Jare Marta oicuaa yave Jesús ou co ovae, ojo oovaiti. Erei María opita o pe.

21 Jayave Marta jei Jesús pe:

—CheYa, nde cuae pe rei yave, mbaetita tei omano chequivi.

22 Jare añave aicuaa oipotagüe reyerure Tumpa pe jese vae Tumpa omeeta co ndeve —jei.

23 —Ndequivi oicove yeta co ou omanogüe vae reta ipite güi —jei Jesús chupe.

24 —Aicuaa oicove yeta co ou omanogüe vae reta ipite güi ara taicuegua pe —jei Marta—. Echa jocuae ara iru vae reta vi oicove yeta yogüeru omanogüe vae reta ipite güi —jei.

25 —Che co amee tecove omanogüe vae reta pe jare aru ye iru omanogüe vae reta ipite güi —jei

Jesús—. Cheré güirovia vae, yepe tei omano oi, oicove yeta co.

²⁶ Jare opaete oicove oi vae cheré güirovia vae ngaraa etei omano. ¿Rerovia pa cuae? —jei.

²⁷ —Arovia, cheYa —jei Marta—. Añave arovia nde co jae Cristo. Nde co jae Tumpa Tai. Echa Tumpa iñee pe oyecuatía oi outa co Tumpa Tai ivi pe —jei.

Jesús oyaeo

²⁸ Marta cuae jei ma yave, ojo oeni María - jae co Marta ipiquii. Jayave güiraja iru vae reta ipite güi jare jei chupe:

—Oporombocoe vae oime cuae pe oi jare oipota reo vaera jae oia pe.

²⁹ María cuae oendu yave, imambae opúa ojo Jesús oia pe.

³⁰ Marta oovaitia peño opita Jesús. Echa ndei oique tenta pe.

³¹ Judío o pe imiari ñogüinoi María pe ombopiacatu vaera vae reta oecha María imambae opúa ojo o güi. Jayave yogüiraja María jaicue. Echa oñemongueta tei jae ojo teogüeriru oia pe oyaeo vaera joco pe.

³² Jayave María ojo ovae Jesús oia pe. Oecha rupive ojo oyeatica jae jóvai jare jei:

—CheYa, nde cuae pe rei yave, mbaetita tei omano chequivi.

³³ Jesús oecha yave María jare judío María ndive yogüeru vae reta oyaeo ñogüinoi, iayequi jare ipiatiti yae.

³⁴ Jayave oparandu:

—¿Quiape pa peñoño?

—Eyu eecha, carai —jei reta chupe.

³⁵ Jayave Jesús oyaeo.

³⁶ Jare judío reta jei:

—Mase, oaiu yae co.

³⁷ Erei amogüe vae jei:

—¿Mbaeti ra ipuere tei cuae cuimbae oyapo mbae agüiye vaera omano Lázaro? Echa omomae cuimbae jesa mbae vae.

Lázaro oicove ye

³⁸ Jesús iayequi ye. Jayave ojo teogüeriru oia pe. Jocuae teogüeriru metei ita guasu oyeyoo vae co jare ita tuicha vae oi teogüeriru jonque re.

³⁹ Jayave Jesús jei:

—Pembosiri ita joco güi.

Marta - jae co cuimbae amiri jeindi - jei chupe:

—CheYa, ine ma co. Echa irundi ara ma omano güire —jei.

⁴⁰ Jesús jei chupe:

—Amombeu ma ndeve rerovia yave reechata mbae ayapota iru vae reta omboete vaera Tumpa.

⁴¹ Jayave ombosiri reta ita teogüeriru jonque güi. Jayave Jesús omae ara re jare jei:

—CheRu, amee yasoropai ndeve nde reendu cheve vae re.

⁴² Aicuaa jecuaeño reendu cheve, erei chemiari corai cuae cheipi rupi ñogüinoi vae reta jeco pegua, jae reta güirovia vaera nde co chembou —jei.

⁴³ Jayave ñeeata.

—Lázaro, ee joco güi —jei.

⁴⁴ Jare cuimbae amiri oe. Ipo jare ipi oyeocua tarapo pe, jare jova oñeoma lienzo pe. Jayave Jesús jei:

—Peyora iyocuaa. Pemaño toguata —jei.

Oñomboemboe reta oyucauca vaera Jesús

⁴⁵ Jare jeta judío yogüeru opou María piri vae reta oecha Jesús oyapo vae jare güirovia jese.

⁴⁶ Erei amogüe vae yogüiraja fariseo reta piri omombeu Jesús oyapo vae.

⁴⁷ Jayave sacerdote reta itenondegua reta jare fariseo reta omboati opaete mburuvicha reta.

—¿Mbae pa yayapota? —jei reta—. Cuae cuimbae jecuaño oyapo jeta miacañi reta.

⁴⁸ Ñamaño yave corai oyapo vaera, opaete tenta pegua reta güiroviata jese. Jayave romano reta yogüeruta ombosururu Tumpa jo jare oyucata opaete ñanerentaigua reta —jei reta.

⁴⁹ Erei metei ipite pe oi vae - Caifás jee vae - jae co sacerdote tenondegua jocuae año - jei:

—Mbaeti etei mbae peicuaa.

⁵⁰ Mbaeti peñemongueta cavi. Echa icavita co ñandeve metei cuimbae omano vaera opaete ñanerentaigua reta oyeepi vaera. Echa mbaeti yave, güiramoí opaete ñanerentaigua reta omanota —jei.

⁵¹ Jare cuae omombeu chupe reta ndei oyeapo mbove. Mbaeti jaeiño omombeu. Echa jae sacerdote tenondegua co jocuae año. Omombeu Jesús omanota opaete judío reta oyeepi vaera.

⁵² Omanota omboati vaera opaete Tumpa tai oñemoai vae reta - mbaetita omano judío reta reño.

⁵³ Jae rambue jocuae ara güive oñomomiari quirai oyucauca vaera Jesús.

⁵⁴ Jae rambue Jesús mbaeti ma opita Judea pe, agüiye vaera judío reta oecha. Ojo joco güi metei tenta Efraín jee vae pe. Jocuae tenta coiño oi ñuu güi. Jare joco pe Jesús opita jemimboe reta ndive.

⁵⁵ Jare coiño ma ou judío reta iyarete pascua jee vae iara, jare jeta judío reta yogüiraja Jerusalén pe joco güi ndei arete iara ou ovae mbove. Echa oipota oyetio Tumpa coti arete peguara.

⁵⁶ Jayave oeca ñogüinoi Jesús, jare Tumpa jo pe ñogüinoi rambueve jei oyoupe:

—¿Mbae pa peñemongueta? ¿Ngaraa pa ou cuae arete pe? —jei reta.

⁵⁷ Echa sacerdote reta itenondegua reta jare fariseo reta oyócuai ma opaete vae corai: “Oime yave quia oicuaa quiape Jesús oime oi vae, tomombeu oreve orepuere roipi vaera”.

12

María opiyere mbae ipiche cavi vae Jesús ipi re

¹ Seis arañño ma oata pascua ovae vaera. Jayave Jesús ojo ye Betania pe. Echa joco pe oico Lázaro tenonde yave omano vae Jesús omoingove ye güeru omanogüe vae reta ipite güi vae.

² Pitu ma yave Lázaro jo pegua reta oyapo Jesús jou vaera. Marta güeru tembü, jare Lázaro oguapi ocaru mesa pe Jesús ndive.

³ Jayave María güeru metei libra mbae ipiche cavi vae nardo jee vae jare opiyere Jesús ipi re. Jayave oyoe ipi ia pe. Jare opaete o ipiche cavi yae.

4 Jayave metei Jesús jemimboe Judas Iscariote jee vae - jae co Simón tai - jae co omoeterengata Jesús jovaicho reta pe vae - jei:

5 —¿Maera pa mbaeti omee cuae mbae ipiche cavi vae trescientos denario pe? Echa ipuereta tei co omee corepoti paravete vae reta pe —jei.

6 Erei jae mbaeti ipiatiti paravete vae reta re. Echa jorai jei imonda rambue. Echa jae güinoi corepoti iru vae reta omee chupe reta vae jiru, jare jecuaño oequi viari chugüi corepoti iyeupe.

7 Jayave Jesús jei:

—Emaño jese. Metei ara añeotiucata co. Jocuæ ara peguara oñovatu cuae mbae ipiche cavi vae —jei—.

8 Paravete vae reta jecuaño yogüirecota pe reta ndive. Erei che ngaraa jecuaño aico pe reta ndive —jei.

Oñomomiari reta oyucauca vaera Lázaro

9 Jare jeta judío reta oicuaa Jesús joco pe oi. Jae rambue yogüeru. Jare mbaeti yogüeru Jesús joco pe oi rambueño. Erei yogüeru omae vaera Lázaro re vi. Echa Jesús omoingove ye Lázaro güeru omanogüe vae reta ipite güi.

10 Jayave sacerdote reta itenondegua reta oñomomiari quirai oyucauca vaera Lázaro vi.

11 Echa Lázaro jeco pegua jeta judío reta yogüiraja chugüi reta. Echa güirovia ma Jesús re.

Jesús oique Jerusalén pe

12 Piareve pe jeta yae arete pe yogüeru ma vae oicuaa Jesús outa ma co Jerusalén pe.

13 Jayave oequi reta carandai joo yogüiraja oovaiti vaera Jesús.

—¡Hosanna! —jei reta—. ÑandeYa tomovendise cuae ombou vae. Tumpa tomovendise Israel pegua reta juvicha guasu —jei reta.

14 Jare Jesús ovae metei mburica mi tairusu vae, jare opo jese. Echa Tumpa iñee pe oyecuatía oi corai:

15 Agüiye equiye, Sion imembi.

Mase, co ou ma nderuvicha guasu.

Opo ou mburica mi tairusu vae re. Jocorai oyecuatía oi.

16 Jocuæ ara Jesús jemimboe reta mbaeti oicuaa cavi cuae regua. Erei Jesús ojo ye ma ara pe yave, imaendúa cuae re. Echa jocorai Tumpa iñee pe oyecuatía oi jese, jare jocorai jae oyapo.

17 Jare amogüe joco pe ñogüinoi vae jei:

—Ore roi Jesús ndive, jae omoingove ye yave Lázaro güeru omanogüe vae reta ipite güi jare oyócuai oe vaera teogüeriru güi —jei reta.

18 Jae rambue jeta vae yogüiraja oovaiti Jesús. Echa oicuaa ma oyapo cuae miacañi.

19 Jayave fariseo reta jei youupe:

—Mase, mbaeti mbae ñandepuere yayapo. Echa opaete tenta pegua reta yogüiraja omae vaera jese.

Griego reta oeca Jesús

20 Jare amogüe griego reta yogüeru ma arete pe iru vae reta ndive omboete vaera Tumpa.

21 Jae reta yogüeru Felipe Betsaida pegua pe - jocuæ Betsaida Galilea pegua co - jare jei chupe:

—Carai, roipota roecha Jesús.

²² Jayave Felipe ojo omombeu Andrés pe. Jayave mócoi reve yogüiraja omombeu Jesús pe.

²³ Jayave Jesús jei:

—Ara ovae ma che ayeapo cuimbaera vae añemboeteuca vaera.

²⁴ Añete che jae peve, metei trigo jaigüe mbaeti yave ñeoti, jaeiño opita. Erei ñeoti yave, jeta yae ñemofña —jei—.

²⁵ Oyeaiu vae ngaraa ñemboasauca. Erei mbaeti oyeaiu cuae ivi pe vae ñemboasaucata co. Güinoita tecove opa mbae vae —jei—.

²⁶ Oyeócuai cheve vae tou cherupíe. Cherembíócuai oita che aita pe. Jare cheRu omboeteucata oyeócuai cheve vae —jei Jesús—.

Jesús omombeu imano

²⁷ Chepiatiti yae ma. Erei mbaeti chepuere jae: CheRu, cherepi cuae ora pe oyeapota cheve vae güi. Echa ovae ma cuae ora cuae oyeapo cheve vaera —jei—.

²⁸ CheRu, eyapo cheve ivi pegua reta nemboete vaera —jei.

Jayave ñee ñeendu ara güi:

—Ayapo ma mbaembae nde rupi ivi pegua reta chemboete vaera, jare corai ayapo yeta co.

²⁹ Jeta joco pe ñogüinoi vae reta oendu ñee jare jei ara co jiapu. Iru reta jei:

—Metei araigua ombou ñnee chupe.

³⁰ Jayave Jesús jei:

—Cuae ñee ñeendu pereco pegua - mbaeti chereco pegua.

³¹ Oñejaa ma ivi pegua reta, jare jae reta juvicha ñemombota co —jei—.

³² Jare iru vae reta chereupi yave ivi güi, arurucata opaete ivi pegua reta checoti —jei.

³³ Cuae jei Jesús oicuauca vaera chupe reta quiraita co omano.

³⁴ Jayave jae reta jei Jesús pe:

—Mboroócuai pe oyecuatía oi vae omombeu oreve Cristo jecuaeño oico. ¿Mbae pa oipota jei jocuae nde rere vae? Echa nde rere iru vae reta oupita ivi güi cuimbaera oyeapo vae. ¿Quia pa co jae cuimbaera oyeapo vae? —jei reta.

³⁵ —Tembipe oico viteri pe reta ndive —jei Jesús—. . Erei ngaraa ima opita pe reta ndive. Peguata tembipe oico pe reta ndive rambueve, agüiye vaera pitu peve. Echa pitumimbi pe oguata vae mbaeti oicuaa queti ojo —jei—.

³⁶ Tembipe pe reta ndive oico rambueve, perovia tembipe re, pe reta pei vaera tembipe rami —jei chupe reta.

Cuae jei ma yave, Jesús ojo chugüi reta, jare mbaeti ma ipuere reta ovae chupe.

Judío reta mbaeti güirovia

³⁷ Erei yepe tei Jesús oyapo jeta miacañi reta jae reta jovaque oicuauca vaera tei chupe reta quia co jae, erei jae reta mbaeti güirovia jese,

³⁸ oyeapo vaera Isaías oicuatía vae - Isaías co jae Tumpa iñee aracae omombeu vae. Echa Isaías oicuatía corai:

CheYa, ¿quia pa güirovia romombeu vae?

¿Quia nunga vae pe pa reicuauca nembaepuere?

Jocorai oicuatía Isaías aracae.

39 Jae rambue jae reta mbaeti ipuere güirovia.
Echa Isaías oicuatía ye corai:

40 Tumpa oyapo reta jesa mbae vae
reta rami jare omopiatanta,
agüiye vaera omae cavi reta,
jare agüiye vaera oicuaa cavi reta,
jare agüiye vaera oyerova icoti.
Echa oyerova yave Tumpa coti,
Tumpa ombogüerata tei co.
Jocorai oicuatía Isaías

41 Isaías cuae jei, oecha yave maemboete pegua
vae. Jae rambue imiari jocorai jese.

42 Erei amogüe mburuvicha reta güirovia Jesús
re. Erei mbaeti oipota jei jae co Cristo fariseo
reta jeco pegua. Echa jocorai jei yave, fariseo reta
omombota tei co judío reta itupao güi.

43 Echa jae reta oipota yae japicha reta omboete
vaera Tumpa omboeteuca vaera güi.

Jesús iñee reta ojaata ivi pegua reta

44 Jayave Jesús iñeeata reve jei:

—Cheré güirovia vae mbaeti chereño güirovia.
Güirovia chembou vae re —jei—.

45 Cherecha vae oecha chembou vae vi —jei—.

46 Ayu ivi pe amee vaera tembipe ivi pegua
reta pe, agüiye vaera cheré güirovia vae opita
pitumimbi pe —jei—.

47 Cheñee re oyeapisaca vae mbaeti yave oyapo
che jae vae rupi, che mbaeti ajaa. Echa che ayu
amboasa vaera ivi pegua reta. Mbaeti ayu ajaa
vaera —jei Jesús—.

48 Jocuae mbaeti güirovia cheré jare mbaeti oy-
apo che jae chupe oyapo vaera vae oñejaata co.

Echa ara taicuega pe cuae che jae vae ojaata —jei chupe reta—.

⁴⁹ Echa cheporomboe mbaeti chembae aeño. Cheru chembou, jare jae cheócuai mbae jae vaera, jare quirai chemiari vaera —jei—.

⁵⁰ Jare aicuaa cheRu cheócuai vae tecove opa mbae vae pegua co. Jae rambue che jae peve cheRu jei cheve vae —jei.

13

Jesús oyoe jemimboe reta ipi

¹ Outa ma arete pascua jee vae iara. Jare Jesús oicuaa ara ovae ma oeya vaera cuae ivi ojo ye vaera Tu piri. Jecuaeño oaiu imbae cuae ivi pe ñogüinoi vae reta, jare añave oicuaucata quirai oaiu yae.

²⁻⁴ Judas Iscariote -jae co Simón tai - oñemongueta ma omoeterenga vaera Jesús jovaicho reta pe. Echa jorai oipota añã guasu Judas oñemongueta vaera. Jare Jesús oicuaa cavi ma opaete mbaraviqui Tu oipota oyapo vaera vae. Oicuaa vi ou co Tumpa güi jare ojo yeta co Tumpa piri. Jare pitu yave Jesús jare jemimboe reta ocaru ñogüinoi yave, Jesús opúa mesa güi, omboi jemimonde iarambuegua, jare oyocua icúa metei toalla pe.

⁵ Jayave oñoño i metei ia pe jare omboipi oyoe jemimboe reta ipi, jare oyoe ma yave, omotini toalla icúa re oi vae pe.

⁶ Jare ojo ovae yave Simón Pedro oia pe, Pedro jei chupe:

—CheYa, ¿nequirei pa reyoe chepi?

7 —Cuae ayapo ai vae mbaeti reicuaa cavi añave —jei Jesús—, erei reicuaa cavita co taicue rupi.

8 —Ngaraa etei reyoe chepi —jei Pedro.

—Jocorai yave, nde mbaeti co cheiru —jei Jesús chupe.

9 Jayave Simón Pedro jei ye:

—CheYa, eyoe chepo jare cheaca vi - mbaeti chepiño.

10 —Oyau ma vae mbaetita oipota ye oyau —jei Jesús—. Ipiño ma oyoeta. Echa opaete jete iquia mbae ma. Jare pe reta pequia mbae ma. Erei mbaeti co opaete pe reta —jei.

11 Echa Jesús oicuaa quia omoeterengata jovai-cho reta pe. Jae rambue jei: “Erei mbaeti co opaete pe reta”.

12 Jayave opa güire ipi reta oyoe, oñemonde ye Jesús jare ojo oguapi jenda pe. Jayave oparandu chupe reta:

—¿Peicuaa cavi pa ayapo ma peve vae?

13 Pe reta pere cheve: “Oporomboe vae”, jare pere vi: “OreYa”. Añete co cuae pere vae. Echa aporomboe jare che co jae peYa —jei chupe reta—.

14 Erei yepe tei che pomboe jare che co jae peYa, erei ayoe ma pepi reta. Jae rambue icavi co pe reta peyoe vaera pepi oyougüi —jei—.

15 Echa che cuae ayapo aicuauca vaera peve, pe reta vi peyapo vaera che ayapo peve vae rami —jei—.

16 Añete che jae peve, metei tembiócuai mbaeti oyócuai iya mbae oyapo vaera. Jae ramiño vi temimondo mbaeti oyócuai omondo vae mbae oyapo vaera —jei—.

17 Cuae peicuaa cavi. Peyapo yave, Tumpa oyapota icavi vae peve —jei Jesús chupe reta—.

18 Mbaeti opaete pe reta re chemiari. Aicuaa quia reta co aiparavo. Erei Tumpa iñee pe oyecuatía oi vae oyeapota co. Echa oyecuatía oi corai: “Jocuae ocaru che ndive vae chemoeterengata co”. Jocrorai oyecuatía oi —jei—.

19 Cuae amombeu peve añave ndei oyeapo mbove, cuae oyeapo yave perovia vaera quia co che —jei—.

20 Añete che jae peve, cheremimondo ombore-sive vae che etei co chemboresive. Jare chemboresive vae omboresive chembou vae —jei.

Jesús omombeu Judas omoeterengata co

21 Cuae jei ma yave, Jesús ipiatiti yae jare jei:

—Añete che jae peve, metei pepite pe oi vae chemoeterengata cherovaicho reta pe.

22 Jayave Jesús jemimboe reta omae oyo. Mbaeti oicuaa quia re ra imiari.

23 Metei jemimboe - jae co Jesús oaiu vae - ocaru oi Jesús iyipi pe.

24 Jayave Simón Pedro omomi iñaca jocuae iru temimboe oecha vaera, jare jae oparandu vaera Jesús pe quia re ra imiari.

25 Jayave jocuae temimboe Jesús iyipi pe ocaru oi vae oparandu Jesús pe:

—¿Quia pa co jae, cheYa?

26 —Ameeta chupe mbiyape —jei Jesús—, tembíu pe amoqui ma yave. Jocuae co jae —jei.

Jayave tembíu pe omoqui ma yave, güinoe omeé Judas Iscariote pe - jae co Simón tai.

²⁷ Jayave Judas jou ma yave, Satanás oya jese. Jayave Jesús jei Judas pe:

—Eyapo voi jocuae reyapota vae.

²⁸ Erei mbaeti quia mesa pe oi vae oicuaa maera Jesús jei jocorai Judas pe.

²⁹ Amogüe vae oñemongueta tei Jesús jei chupe vae oipota jei: “Ecu egua yaipota arete peguara vae”, ani: “Ecu emee mbae paravete vae reta pe”. Echa Judas güinoi corepoti jiru.

³⁰ Jayave opa güire jou mbiyape, Judas oe voi ojo. Jare pïtu ma co.

Mboroócuai ipïau vae

³¹ Jayave oe ma yave Judas, Jesús jei:

—Che ayeapo cuimbaera. Añave ivi pegua reta chemboeteta. Jare omboeteta vi Tumpa chereco pegua —jei—.

³² Ivi pegua reta omboeteta Tumpa chereco pegua. Jae rambue Tumpa etei chemboeteucata ivi pegua reta pe. Añave voi chemboeteucata —jei—

³³ Cherivi reta, michi peguaño ma apitata pe reta ndive. Jayave chereca teita, erei pe reta ngaraa pepuere peo che ajataa pe. Echa corai amombeu judío reta pe, jare añave amombeu peve vi —jei—.

³⁴ Amee peve metei mboroócuai ipïau vae. Peyoaiu. Peyoaiu che poaiu rami —jei Jesús chupe reta—.

³⁵ Peyoaiu yave, opaete ivi pegua reta oicuaata pe reta cheremimboe reta co —jei.

Jesús omombeu Pedro oicuacuta co

³⁶ Simón Pedro jei Jesús pe:

—CheYa, ¿queti pa reota?

—Ngaraa añave ndepuere reo che ajataa pe —jei Jesús—. Erei taicue rupi reota co —jei.

³⁷ Pedro jei ye:

—CheYa, ¿maera pa mbaeti chepuere aja nde ndive añave? Che tamano nderecovia pe —jei.

³⁸ —Nde rere remanota cherecovia pe —jei Jesús—. Añete che jae ndeve, ndei tacareo oñee piipii mbove, mboapi vese ma checuacuta —jei—.

14

Jesús co jae tape Tumpa pe ojo vae

¹ Agüiye pepiatiti. Perovia Tumpa re. Perovia vi cheré —jei—.

² CheRu jo pe oime jeta o. Mbaeti yave jorai, amombeuta tei co pepe. Ajata ayapocavi vaera perendara —jei Jesús chupe reta—.

³ Jare aja ma yave ayapocavi vaera perendara, ayu yeta pomboresive vaera, pe reta vi peico vaera che aicotaa pe —jei—.

⁴ Jare pe reta peicuaa tape que rupi ajata —jei.

⁵ Jayave Tomás jei:

—OreYa, ore mbaeti roicuaa queti reota. ¿Quiraita ra roicuaa tape?

⁶ —Che co jae tape —jei Jesús—. Che co jae añete vae re imiari vae. Che co jae tecove opa mbae vae omev vae. Mbaeti quia ipuere oñemoiru cheRu ndive jaeño che rupi —jei—.

⁷ Checuaa cavi yave mona, peicuaata tei co cheRu vi. Erei añave güive peicuaa co. Echa pecha ma —jei.

⁸ Felipe jei chupe:

—OreYa, eechauca oreve ndeRu. Jocu aeño roipota.

⁹ —Ima ma aico nde ndive, Felipe —jei Jesús—. ¿Ndei pa co checuaa cavi? Cherecha vae oecha ma co cheRu. ¿Maera pa rere: “Echauca oreve ndeRu”? —jei—.

¹⁰ ¿Mbaeti pa perovia che aico cheRu ndive jare cheRu oico che ndive? Ñee amombeu peve vae mbaeti chembae aeño. Echa cheRu oico che ndive, jare jae oyapo mbaraviqui reta —jei Jesús—.

¹¹ Perovia cuae che jae peve vae: Che aico cheRu ndive, jare cheRu oico che ndive. Cuae mbaeti perovia yave, chererovia mbaraviqui ayapo vae reta jeco pegua —jei—.

¹² Añete che jae peve, cheré güirovia vae oyapota mbaraviqui reta che ayapo ma vae reta rami. Jare iparaviqui reta tuicha yaeta cheparaviqui reta güi, che ajata cheRu piri rambue —jei—.

¹³ Pepuereta peyerure oipotagüe mbae re cheree re, jare che ayapota peve, cheRu oñemboeteuca vaera che ayapota vae rupi —jei—.

¹⁴ Peyerure yave oipotagüe mbae re cheree re, ayapota co peve —jei Jesús chupe reta—.

Espíritu Santo outa

¹⁵ Cheraïu yave, peyapo cheporoócuai reta —jei—

¹⁶ Jare che ayerureta cheRu pe jae ombou vaera peve iru vae. Jae jecuaeño oicota pe reta ndive pembopiacatu vaera. Jae co Espíritu Santo —jei—.

¹⁷ Jae imiarita añete vae re. Oporogüirovia mbae vae reta ngaraa ipuere omboresive Espíritu

Santo. Echa oporogüirovia mbae vae reta mbaeti oecha jare mbaeti oicuaa. Erei pe reta peicuaa. Echa jae oico pe reta ndive jare oicota pepia pe — jei—.

¹⁸ Che aja ma yave, ngaraa peico jentara mbaeti güinoi vae reta rami. Echa che ayu yeta co —jei—.

¹⁹ Michi peguaño ma ivi pegua reta cherechata. Ngaraa ma cherecha ye. Erei pe reta cherecha yeta. Che jecuaeño aico rambue, pe reta peicota vi —jei chupe reta—.

²⁰ Jocuae ara peicuaata co che aico cheRu ndive, jare pe reta peico che ndive, jare che aico pepia pe —jei—.

²¹ Oime yave quia oyeapisaca cheporoócuai reta re oyapo vaera vae, jae co cheraiu. Jare cheRu oaiuta cheraiu vae, jare che aaiuta, jare aicuaucata chupe quia co che —jei.

²² Jayave Judas - mbaeti co Judas Iscariote - jei chupe:

—OreYa, ¿quiraita pa reicuauca oreve quia co nde, mbaeti yave reicuauca oporogüirovia mbae vae reta pe?

²³ —Cheraiu vae oyapota che jae chupe oyapo vaera vae —jei Jesús—. Jare cheRu oaiuta. Jare royuta roico vaera jae ndive —jei—.

²⁴ Mbaeti cheraiu vae mbaeti oyapo che jae chupe oyapo vaera vae. Jare cheñee peendu vae mbaeti co chembae aeño. Echa cuae ñee cheRu iñee co. Jae co chembou —jei—.

²⁵ Cuae mbaembae re chemiari ma peve, aico pe ndive rambueve.

²⁶ Erei jocuae pembopiacatuta vae pemboeta opaete mbae re. CheRu ombouta peve cheree re.

Jae co Espíritu Santo. Jae pemomaenduata opaete che jae peve vae re —jei—.

²⁷ Mbiacatu aeya pe ndive. Mbiacatu che anoi vae amee peve. Ivi pegua reta mbaeti ipuere omee peve che amee peve vae nunga mbiacatu. Agüiye pepiatiti. Agüiye pequiye —jei—.

²⁸ Peendu ma quirai che jae: “Ajata ma jare ayu yeta peve”. Cheraiu yave mona, peyeroviata tei. Echa ajata cheRu piri, jare cheRu imbaepuere tuicha yae chembaepuere güi —jei—.

²⁹ Amombeu ma peve ndei oyeapo mbove, perovia vaera oyeapo yave —jei—.

³⁰ Ngaraa ma ima chemiari peve. Echa ivi pegua reta juvicha imambae outa ovae cheve. Erei ngaraa ipuere cheré —jei—.

³¹ Erei ayapota cheRu iporoócuai, ivi pegua reta oicuaa vaera che aaiu cheRu. Pepúa, yaja mo cuae güi —jei chupe reta—.

15

Jesús co jae uva añetete vae rami

¹ Che co jae uva añetete vae rami, jare cheRu co jae uva iñangarecoa rami —jei—.

² Opaete jaca mbaeti ia güinoi vae reta cheRu oyasiata. Jare opaete jaca ia güinoi vae reta jae oitiota, jeta ia güinoi vaera —jei—.

³ Pe reta peyetiouca ma ñee amombeu peve vae pe —jei—.

⁴ Peico cheré perovia reve, jare che aicota pepia pe. Metei jaca oyeasia yave uva güi, ngaraa ipuere oyapo ia. Echa jaca aeño mbaeti ipuere oyapo ia. Jae ramiño vi pe reta mbaeti yave peico cheré

perovia reve, ngaraa pepuere peyapo icavi vae Tumpa peguara —jei—.

⁵ Che co jae uva rami, jare pe reta co jae jaca reta rami. Jocuæ oico cheré güirovia reve vae oyapota jeta icavi vae Tumpa peguara. Echa che aico ipia pe. Erei mbaeti yave che aico pepia pe, mbaetita mbae pepuere peyapo Tumpa peguara —jei—.

⁶ Jocuæ mbaeti oico cheré güirovia reve vae oñemombota metei jaca oyeasia vae oñemombo yipi vaera vae rami. Jare jaca yipi vae reta oñemboatiuca jare oñemondouca tata pe ócai vaera —jei—.

⁷ Peico yave cheré perovia reve, jare peyapo yave che jae peve peyapo vaera vae, pepuereta peyerure peipota vae re jare penoita co —jei—.

⁸ Peyapo yave jeta icavi vae cheRu peguara, ivi pegua reta omboeteta cheRu. Jare corai peicuaucata pe reta co cheremimboe reta —jei—.

⁹ CheRu cheraiu. Jae ramiño vi che poaiu, Jecuaeño peico cheraiu reve —jei—.

¹⁰ Peyapo yave cheporoócuai reta, peicota co cheraiu reve. Echa corai che ayapo cheRu iporoócuai reta, jare jecuaeño che aico aaiu reve —jei Jesús chupe reta—.

¹¹ Corai chemiari ma peve peyerovia vaera che ayerovia rami. Corai ayapo peyerovia yae vaera —jei—.

¹² Cuae co jae cheporoócuai: Peyoaiu che poaiu rami.

¹³ Oime yave quia iquirei omano oepi vaera iamingo reta vae, iporoaiu tuicha yae co iru mboroiu güi —jei—.

¹⁴ Pe reta co jae cheamingo reta, peyapo yave

che jae peve peyapo vaera vae —jei—.

¹⁵ Mbaeti ma che jae peve pe reta co cherembiócuai reta. Echa tembiócuai mbaeti oicuaa mbae ra oyapo iya. Erei che jae ma peve pe reta co jae cheamingo reta. Echa opaete cheRu omombeu cheve vae aicuauca ma co peve —jei chupe reta—.

¹⁶ Pe reta mbaeti cheparavo. Che co poparavo. Jare amee ma peve mbaepuere peo vaera peyapo icavi vae Tumpa peguara, jare jecuae jocarai peyapo vaera. Cuae ayapo cheRu omee vaera peve oipotagüe peyerureta chupe jese cheree re vae —jei—.

¹⁷ Cuae co poócuai: Peyoaïu —jei—.

Oporogüirovia mbae vae reta omotareï Jesús jare imbae reta

¹⁸ Peñemotareïuca oporogüirovia mbae vae reta pe yave, pemaendúa quirai jae reta che rani co chemotareï —jei—.

¹⁹ Peico yave mona oporogüirovia mbae vae reta yogüireco rami, oporogüirovia mbae vae reta peraiuta tei. Erei che poparavo ma oporogüirovia mbae vae reta ipite güi. Jae rambue mbaeti ma peico oporogüirovia mbae vae reta yogüireco rami. Jae rambue peñemotareïuca oporogüirovia mbae vae reta pe —jei—.

²⁰ Pemaendúa cuae che jae peve vae re: “Metei tembiócuai mbaeti oyócuai iya mbae oyapo vaera”. Echa oporogüirovia mbae vae reta oyapo yave icavi mbae vae cheve, oyapota icavi mbae vae peve vi. Oyapo reta yave che jae chupe oyapo vaera vae, oyapota pe reta pere chupe oyapo vaera vae vi —jei—.

21 Erei oporogüirovia mbae vae reta oyapota peve opaete cuae mbaembae cheré perovia rambue. Echa jae reta mbaeti oicuaa chembou vae — jei—.

22 Mbaeti yave mona ayu chemiari vaera chupe reta, ngaraa tei güinoi teco. Erei añave opaete vae ipuere oicuaa jae reta güinoi co teco — jei—.

23 Chemotarei vae omotarei cheRu vi — jei—.

24 Mbaeti yave mona ayapo ipite pe mbaraviqui mbaeti quia ye oyapo vae reta, ngaraa tei güinoi teco. Erei jae reta cherecha ma - jae co cheRu oecha rami - jare oremotarei — jei—.

25 Cuae oyapo reta oyeapo vaera mboroócuai pe oyecuatía oi vae. Echa oyecuatía oi corai: “Jae reta chemotarei mbaeti mbae icavi mbae vae ayapo chupe reta reve”. Jocorai oyecuatía oi — jei—.

26 Erei abouta peve cheRu oicoa güi pembopiacatuta vae - jae co Espíritu Santo añete vae re imiarita vae. Jae ou yave, chemombeuta co — jei—.

27 Jare pe reta vi chemombeuta. Echa tenonde güive peico che ndive — jei—.

16

1 Opaete cuae che jae ma peve agüiye vaera peyerova Tumpa güi — jei—.

2 Peñemomboucata co judío reta itupao reta güi. Añete co, outa ma ara peyeyucauca vaera. Jare jocuae reta peyucata vae oñemongueta teita oyeócuai co oi Tumpa pe — jei—.

3 Jae reta mbaeti oicuaa cheRu jare mbaeti vi checuaa. Jae rambue jocorai oyapota — jei chupe reta—.

⁴ Erei cuae che jae ma peve, pemaendúa vaera corai amombeu peve vae re jocorai oyapo reta yave —jei—.

Espíritu Santo oyapo vae

Mbaeti amombeu peve cuae tenonde güive. Echa che aico pe ndive.

⁵ Erei ajata chembou vae piri. Jare mbaeti metei ave añave peparandu cheve: “¿Queti pa reota?” —jei—.

⁶ Erei cuae che jae peve vae jeco pegua pepiatiti yae.

⁷ Erei amombeu peve añete vae. Icavita co peve che aja vaera. Echa che mbaeti yave aja, ngaraa ou peve pembopiacatuta vae. Erei aja yave, ambouta peve.

⁸⁻¹¹ Jare jae ou yave, oicuaucata ivi pegua reta pe jae reta oyapo co mbaeyoa. Echa mbaeti güirovia cheré. Oicuaucata jupi vae. Echa ajata cheRu oia pe jare pe reta ngaraa ye ma cherecha. Oicuaucata Tumpa ojaata ivi pegua reta. Echa ojaa ma ivi pegua reta juvicha —jei—.

¹² Oime jeta aipota tei jae peve vae, erei mbaeti viteri pepuere peicuaa cavi —jei—.

¹³ Erei Espíritu Santo añete vae re imiarita vae ou ma yave, omombeuta peve añete vae. Echa ñee omombeuta peve vae ngaraa imbae aeño. Imiarita Tumpa omombeu chupe vae re, jare omombeuta peve oyeapota vae —jei—.

¹⁴ Jae chemboeteucata co. Echa jae pemboeta che pomboe rami —jei Jesús chupe reta—.

15 Opaete cheRu imbae chembae vi co. Jae rambue che jae corai: “Jae pemboeta che pomboe rami” —jei—.

Ipiatiti güire oyeroviata co

16 Michi peguaño ma pe reta cherechata. Erei imambae cherecha yeta. Echa ajata cheRu piri — jei chupe reta.

17 Amogüe jemimboe reta jei oyoupe:

—¿Mbae pa oipota jei cuae jei ñandeve vae? Echa jei: “Michi peguaño ma pe reta cherechata. Erei imambae cherecha yeta”. Jare jei vi: “Echa ajata cheRu piri”.

18 ¿Mbae pa oipota jei: “Michi peguaño ma”? Mbaeti yaicuaa mbae ra oipota jei —jei reta.

19 Jesús oicuaa jae reta oipota tei oparandu chupe cuae re. Jae rambue jei chupe reta:

—Che jae peve corai: “Michi peguaño ma pe reta cherechata. Erei imambae cherecha yeta”. Jare peparandu pei oyoupe mbae ra oipota jei cuae che jae peve vae —jei—.

20 Añete che jae peve, peyaeta jare pepiatitita, erei oporogüirovia mbae vae reta oyeroviata. Pepiatitita co, erei pepiatiti güire peyeroviata co — jei—.

21 Metei cuña imembí oata ma oi yave, cuña ipiatiti jasi chupe rambue. Erei imembí oa ma yave, mbaeti ma imaendúa jasi chupe vae re. Echa oyerovia imembí oa ma rambue —jei—.

22 Jae ramiño vi pe reta pepiatiti añave, erei poecha yeta, jare peyeroviata, jare ngaraa quia ipuere pembopiatiti ye —jei—.

23 Jocuæ ara ngaraa peparandu cheve mbae re. Añete che jae peve, oipotagüe peyerureta cheRu pe jese vae cheRu omeeta peve cheree re —jei—.

24 Ndei rani peyerure mbae re cheree re. Peyerure Tumpa pe mbaembae re, jare cheRu omeeta co peve peyerovia yae vaera —jei—.

Che chepuere yae ivi pegua reta güi

25 Cuae amombeu ma peve amojaanga reve. Erei outa ma ara amombeu cavi vaera peve cheRu regua. Ngaraa ye amombeu peve amojaanga reve —jei—.

26 Jocuæ ara reta pe peyerureta mbaembae re cheree re. Jare che mbaeti jae peve ayerureta cheRu pe jae oyapo vaera peyerure jese vae —jei—.

27 Echa cheRu etei peraiu, pe reta cheraiu jare perovia che ayu cheRu güi rambue —jei—.

28 Ayu co cheRu güi cuae ivi pe. Aja yeta ma cuae ivi güi cheRu piri —jei chupe reta.

29 Jesús jemimboe reta jei chupe:

—Añave remombeu cavi ma oreve remojaanga mbae reve.

30 Añave roicuaa nde reicuaa co opaete, jare mbaeti remonesesita quia omombeu vaera ndeve mbae re. Cuae jeco pegua rogüirovia nde reyu co Tumpa güi —jei reta.

31 Jesús jei chupe reta:

—Pe reta pere perovia ma.

32 Erei outa ma ara - ou ma co - pe reta peñemoai vaera. Chereyata jare metei ñavo peota pero pe. Cheño apitata. Erei ngaraa cheño aico. Echa cheRu oico che ndive —jei—.

³³ Cuae che jae ma peve pepiacatu vaera cheré perovia rambue. Cuae ivi pe peico rambueve, peiporarata co. Erei agüiye pepiatiti. Echa che chepuere yae ivi pegua reta güi –jei.

17

Jesús oyerure Tumpa pe jemimboe reta re

¹ Cuae jei ma yave, Jesús omae ara re jare jei:

–CheRu, ara ovae ma. Che co jae ndeRai. Chemboeteuca, chepuere vaera romboeteuca vi –jei–.

² Echa nde cheapo ma opaete vae iYara, amee vaera tecove opa mbae vae opaete nde remee cheve vae reta pe –jei–.

³ Oime yave quia ñandecuaa vae, jae güinoi tecove opa mbae vae. Nde co jae meteiño Tumpa añetete vae. Che co jae Jesucristo. Nde chembou –jei–.

⁴ Che romboeteuca ma cuae ivi pe. Echa opa ma ayapo mbaraviqui nde remee cheve ayapo vaera vae –jei–.

⁵ Ndei ivi oyeapo mbove aico nde ndive yave añemboeteuca co. Jae ramiño vi añave chemboeteuca ye nderóvai –jei–.

⁶ Nde remee ma cheve cuae cuimbae reta oporogüirovia mbae vae reta ipite güi. Che amombeu ma nderegua cuae reta pe. Jae reta nembae co jare nde remee ma cheve. Jae reta oyapo nde rere chupe reta oyapo vaera vae –jei–.

⁷ Jae reta oicuaa opaete nde remee cheve vae ou co ndegüi.

⁸ Echa che amee ma chupe reta ñee nde remee cheve vae, jare jae reta güirovia neñee. Oicuaa

cavi che ayu co ndegüi. Güïrovia ma nde co chembou —jei—.

⁹ Ayerure ndeve jese reta. Mbaeti ayerure oporogüïrovia mbae vae reta re. Ayerure ndeve nde remee cheve vae reta re. Echa jae reta nembae co —jei—.

¹⁰ Opaete chembae nembae co, jare nembae chembae co. Jare che añemboeteuca ma jae reta jeco pegua —jei—.

¹¹ Jare ngaraa ma aico cuae ivi pe. Erei jae reta opitañota cuae ivi pe. Che ajata ma ndepiri. CheRu, nde co jae jupi vae. Cuae reta remee ma cheve. Embori nembraepuere pe, agüïye vaera oyerova ndegüi, jare yogüïreco vaera metei ramiño. Echa jorai ñande yaico metei ramiño —jei—.

¹² Che aico jae reta ndive rambueve, che ambori nembraepuere pe cuae remee cheve vae reta, agüïye vaera oyerova ndegüi. Meteiño ojota cañitei pe, neñee pe oyecuatía oi vae oyeapo vaera. Erei ambori iru reta, agüïye vaera yogüïraja cañitei pe —jei—.

¹³ Erei ajata ma ndepiri. Corai chemiari chupe reta ivi pe aico rambueve, jae reta oyerovia yae vaera che ayerovia yae rami —jei—.

¹⁴ Amee ma chupe reta neñee, jare oñemotareuca oporogüïrovia mbae vae reta pe. Che mbaeti aico oporogüïrovia mbae vae reta yogüïreco rami. Jae ramiño vi jae reta mbaeti yogüïreco oporogüïrovia mbae vae reta yogüïreco rami —jei—.

¹⁵ Mbaeti ayerure ndeve nde reraja vaera cuae ivi güi. Ayerure ndeve rembori vaera, agüïye vaera icavi mbae vae iya omoamiri —jei—.

16 Che mbaeti aico oporogüirovia mbae vae reta yogüireco rami. Jae ramiño vi jae reta mbaeti yogüireco oporogüirovia mbae vae reta yogüireco rami.

17 Eñono tee reta ndeyeupeguara añete vae rupi. Neñee co jae añete vae —jei Jesús—.

18 Nde chembou ivi pe. Jae ramiño vi che amondo cuae reta opaete ivi rupi —jei—.

19 Cuae reta jeco pegua añeñono tee ma ndevenguara, jae reta vi oñeñono tee vaera ndevenguara añete vae rupi —jei—.

20 Jare ayerure ndeve cheré güiroviata vae re. Echa güiroviata cuae reta iñee rupi. Mbaeti cuae reta reño ayerure ndeve —jei—.

21 Ayerure ndeve opaete jae reta yogüireco vaera metei ramiño. Nde reico che ndive, cheRu, jare che aico nde ndive. Jae ramiño vi ayerure ndeve cuae reta yogüireco vaera ñanderé güirovia reve, ivi pegua reta güirovia vaera nde co chembou —jei—.

22 Nde chemboeteuca co. Jae ramiño vi che amboeteuca cuae reta, jae reta yogüireco vaera metei ramiño. Echa jorai ñande yaico metei ramiño —jei Jesús—.

23 Nde reicota che ndive jare che aicota ipia pe, añetete yogüireco vaera metei ramiño, ivi pegua reta oicuaa vaera nde co chembou jare nde reaiu co cuae reta nde cheraiu rami —jei—.

24 CheRu, aipota cuae remee cheve vae reta vi yogüireco vaera che aicotaa pe, oecha vaera maemboete nde remee ma cheve vae. Echa ndei ivi oyeapo mbove nde cheraiuño mai —jei—.

²⁵ CheRu, nde co jae jupi vae. Oporogüirovia mbae vae reta mbaeti ndecuaa. Erei che co rocuaa, jare cuae reta oicuaa nde co chembou – jei–.

²⁶ Che romombeu ma chupe reta jare romombeu yeta, jae reta nderaiu vaera nde cheraiu rami, jare che aico vaera ipia pe –jei.

18

Oip#i reta Jesús

¹ Jesús cuae jei ma yave, oasa jemimboe reta ndive iaca Cedrón, jee vae jovaicho pe ojo ovae ivira reta ñogüinoia pe. Joco pe oique Jesús jare jemimboe reta.

² Jare Judas - jae co omoeterenga jovaicho reta pe vae - oicuaa jocuae ivira reta ñogüinoia. Echa joco pe oñemboatiñoi yepi Jesús jemimboe reta ndive.

³ Jayave Judas ojo sacerdote reta itenondegua reta jare fariseo reta ñogüinoia pe, jare jae reta omondo amogüe sundaro reta jare jembiócuai reta ivira reta ñogüinoia coti Judas jupie. Güiraja reta mechero reta jare ivira reta jare quisepecueta.

⁴ Jayave Jesús ojo jae reta coti jare jei:

—¿Quia pa peeca?

Echa jae oicuaa ma mbae oyeapota chupe vae.

⁵ —Jesús Nazaret pegua —jei reta.

—Che co jae —jei Jesús.

Jare Judas - jae co omoeterenga jovaicho reta pe vae - oñemboi oi joco pe jae reta ndive.

⁶ Jesús jei yave chupe reta: “Che co jae”, jae reta opa oñemoata jaicue coti jare oa reta ivi re.

⁷ Jayave Jesús oparandu ye chupe reta:

—¿Quia pa peeca?

Jei reta ye:

—Jesús Nazaret pegua.

⁸—Amombeu ma peve che co jae —jei Jesús—. Pe reta che chereca. Jae rambue pemaño cuae che ndive ñogüinoi vae reta re yogüiraja vaera —jei.

⁹ Cuae jei oyeapo vaera tenonde yave jei vae: “Mbaeti amocañi metei ave nde remee cheve vae reta güi”. Jocorai jei ma.

¹⁰ Jare Simón Pedro güinoi metei quisepecu. Jayave oequi jiru güi jare oiporu sacerdote tenondegua jembíocuai inambi iyacatu re, jare inambi oyeequi. (Jocuae tembiócuai jee co Malco.)

¹¹ Jayave Jesús jei Pedro pe:

—Eño no ye ndequisepecu jiru pe. Aiporarañotai co. Echa cheRu oipota aiporara vaera —jei.

Jesús Anás jóvai

¹² Jayave sundaro reta juvicha ndive jare judío reta itenondegua reta jembíocuai reta oip# Jesús oñapiti.

¹³ Jayave güiraja Jesús Anás pe rani - jae co Caifás jembireco tu - Caifás co jae sacerdote tenondegua jocuae año.

¹⁴ Tenonde yave cuae Caifás omombeu judío reta pe icavita co chupe reta metei cuimbae omano vaera opaete tenta pegua reta jecovia pe.

Pedro Anás joca pe

¹⁵ Jare Simón Pedro jare iru temimboe yogüiraja Jesús jaicue. Jare cuae iru temimboe oique sacerdote tenondegua joca pe Jesús oique yave. Echa sacerdote tenondegua oicuaa cuae temimboe.

¹⁶ Erei Pedro mbaeti oi que oca pe. Opita oñemboi oi taraquera iyipi pe. Jayave iru temimboe sacerdote tenondegua oicuaa vae oe imiari cuñatai taraquera oaro vae pe jare güiroique Pedro.

¹⁷ Jayave cuñatai taraquera oaro vae jei Pedro pe:

—¿Jaea pa co nde metei jocuae cuimbae jemimboe?

—Mbaeti co —jei Pedro.

¹⁸ Jare sacerdote tenondegua jembíocuai reta jare judío reta itenondegua reta jembíocuai reta oyapo ma tata jare oñemboi reta tata iyipi rupi oyepee vaera. Echa iroi ma. Pedro vi opita joco pe oñemboi jae reta ndive oyepee vaera.

Anás oparandu Jesús pe

¹⁹ Jayave sacerdote tenondegua oparandu Jesús pe jemimboe reta re jare iporomboe re.

²⁰ Jayave Jesús jei chupe:

—Che chemiari co opaete vae jovaque. Jecuaeño aporomboe judío reta itupao reta pe jare Tumpa jo pe. Echa joco pe jecuaeño oñemboati judío reta. Mbaeti etei chemiari viari pe —jei—.

²¹ ¿Maera pa reparandu cheve? Eparandu oyeapisaca cheré vae reta pe che jae chupe reta vae re. Jae reta oicuaa che jae vae —jei.

²² Cuae jei ma yave Jesús, metei judío reta itenondegua reta jembíocuai joco pe oi vae ocua Jesús jova re.

—¿Maera pa jocorai nemiari sacerdote tenondegua pe? —jei.

23 —Mbaeti yave icavi chemiari, emombeu mbae ra mbaeti icavi —jei Jesús—. Erei icavi chemiari. ¿Maera pa recua cheré? —jei.

24 Jayave Anás omondo Jesús iyocuaa reve Caifás piri - jae vi co sacerdote tenondegua.

Pedro oicuacu Jesús

25 Jare Simón Pedro oñemboi oyepee oi tata pe. Iru vae reta jei chupe:

—¿Jaea pa co nde metei jemimboe?

Pedro oicuacu. Jei:

—Mbaeti co.

26 Metei sacerdote tenondegua jembiócuai - jae co jocuae cuimbae oyeequi inambi Pedro ocua jese yave vae jentara - jei Pedro pe:

—Che roecha co ivira reta ñogüinoia pe jae ndive.

27 Pedro jei ye:

—Mbaeti co.

Jare cuae jei ma yave, tacareo oñee.

Jesús Pilato jóvai

28 Jayave güiraja reta Jesús Caifás jo güi pretorio jee vae pe. Neimbove asi viteri. Jae reta mbaeti oique pretorio japipe pe. Echa oique yave joco pe jocuae ara, iporomboe omombeu chupe reta oñemonguiata tei co, jare ngaraa tei ipuere jou vecha isoo pascua pegua.

29 Jayave Pilato oe chupe reta.

—¿Mbae re pa pemboeco cuae cuimbae? —jei chupe reta.

30 —Cuae cuimbae jecocavi yave mona, ngaraa tei romoeterenga ndeve —jei reta.

31 —Pe reta etei peraja pejaa vaera peporoócuai rupi —jei Pilato.

—Romano reta mbaeti omaeño oreré royuca vaera quia —jei reta.

32 Jocrorai jei reta, oyeapo vaera Jesús jei ma oyeapota chupe vae. Echa Jesús omombeu ma quiraita co omano.

33 Jayave Pilato oi que ye pretorio pe jare oeni Jesús.

—¿Nde pa co jae judío reta juvicha guasu? —jei.

34 —¿Nde aeño pa reñemongueta jocrorai, ani iru vae reta pa omombeu ndeve cheregua? —jei Jesús.

35 —Che mbaeti co metei judío —jei Pilato—. Nerentaigua reta jare sacerdote reta itenondegua reta nemoeterenga cheve. ¿Mbae pa reyapo? —jei.

36 —Che co jae metei mburuvicha guasu —jei Jesús—, erei che mbaeti co mburuvicha guasu ivi pegua reta rami. Che jocuae reta rami yave mona, cherembiócuai reta oñorarota tei, agüiye vaera añemoeterenga judío reta pe. Erei che mbaeti co mburuvicha guasu ivi pegua reta rami —jei Jesús.

37 Jayave Pilato jei chupe:

—¿Nde pa co jae metei mburuvicha guasu?

—Nde rere ma che co jae metei mburuvicha guasu —jei Jesús—. Cuaera ayeapo cuimbaera. Cuaera ayu ivi pe. Ayu amombeu vaera añete vae. Opaete añete vae güirovia vae reta oyeapisaca cheñee re —jei.

38 Jayave Pilato oparandu chupe:

—¿Mbae pa jocuae añete vae?

Pilato jei Jesús omanota co

Jare cuae jei ma yave, Pilato oe ye judío reta jóvai jare jei chupe reta:

—Mbaeti etei teco avae jese.

³⁹ Erei pe reta jecuaeño peipota ayora vaera peve metei tembipii pascua pe. ¿Peipota pa ayora vaera peve cuae judío reta juvicha guasu? —jei chupe reta.

⁴⁰ Jae reta iñeeta reve jei:

—Agüye eyora jocuae cuimbae. Eyora oreve Barrabás —jei reta.

Jocuae Barrabás imonda vae co.

19

¹ Jayave Pilato güirajauca Jesús oinupauca chicote pe.

² Jare sundaro reta oñope yuu catuai vae Jesús iñaca reguara, jare oñoño Jesús iñaca re. Jare omondeuca reta Jesús pe temimonde pita vae.

³ Jayave jei reta chupe:

—¡Viva! Judío reta juvicha guasu.

Jayave ocua reta jese ipo pe.

⁴ Jayave Pilato oe ye, jare jei judío reta pe:

—Mase, aruta peve peicuaa vaera mbaeti co avae teco jese.

⁵ Jayave Jesús oe. Güinoi jocuae yuu catuai vae iñaca re jare omonde temimonde pita vae. Jayave Pilato jei ye chupe reta:

—Mase, co oi cuae cuimbae.

⁶ Sacerdote reta itenondegua reta jare jembíocuai reta oecha yave Jesús, iñeeta reve jei:

—¡Eicutuca curusu re, eicutuca curusu re!

Jayave Pilato jei chupe reta:

—Pe reta etei peraja peicutuca curusu re. Echa che mbaeti etei teco avae jese —jei.

⁷ Judío reta jei Pilato pe:

—Ore rogüinoi metei mboroócuai, jare jocuae mboroócuai rupi omanota co. Echa jei jae co Tumpa Tai —jei reta.

⁸ Cuae oendu yave, Pilato oquiye yae.

⁹ Jayave oique ye pretorio pe jare oparandu Jesús pe:

—¿Quia pegua pa nde?

Erei Jesús mbaeti mbae jei chupe.

¹⁰ Jayave Pilato jei ye chupe:

—¿Maera pa mbaeti neñee remoe cheve? Che anoi mbaepuere rocutuca vaera curusu re. Anoi vi mbaepuere royora vaera. ¿Mbaeti pa reicuaa cuae? —jei.

¹¹ —Mbaeti yave Tumpa omaeño nderé, ngaraa tei ndepuere cheré —jei Jesús—. Jae rambue chemoeterenga ndeve vae iyoa yae ma co.

¹² Cuae oendu ma yave, Pilato oipota tei oyora Jesús. Erei judío reta iñeeata reve jei:

—Cuae cuimbae reyora yave, nde mbaeti ma co reyeócuai César pe. Echa oipotagüe jei jae co mburuvicha guasu vae oyovaicho ma César ndive —jei reta.

¹³ Pilato cuae oendu yave, güinoe Jesús jare oguapi Empedrado jee vae pe. (Cuae co jee Gabata hebreo iñee pe.) Echa joco pe jecuaeño ojaa teco güinoi vae reta.

¹⁴ Jare jocuae ara judío reta oyeapocatu ñogüinoi pascua peguara, jare neimbove asi viteri. Jayave Pilato jei judío reta pe:

—Co oi peruvicha guasu.

¹⁵ Jayave jae reta iñeeta reve jei:

—¡Erajauca cuae güi, erajauca cuae güi, eicutuca curusu re!

Pilato oparandu chupe reta:

—¿Aicutucata pa peruvicha guasu?

Jayave sacerdote reta itenondegua reta jei:

—Jaeño César oreruvicha guasu co.

¹⁶ Jayave Pilato omoeterenga Jesús chupe reta oicutuca vaera curusu re. Jayave jae reta oipii Jesús güiraja.

Jesús oyecutuca curusu re jare omano

¹⁷ Jayave Jesús oe jare ovoï güiraja icurusu. Jayave sundaro reta güiraja Jesús Acagüerenda jee vae pe. (Cuae co jee Gólgota hebreo iñee pe.)

¹⁸ Joco pe oicutu reta Jesús curusu re. Oicutu reta vi iru mócoi cuimbae reta jare oñono metei Jesús iyacatu coti jare iru iyasu coti. Jesús oi ipau pe.

¹⁹ Jare Pilato oicuatía curusu re oñonouca vaera. Corai oyecuatía oi: “Jesús Nazaret pegua, judío reta juvicha guasu”.

²⁰ Jare jeta judío reta omongueta cuae oyecuatía oi vae. Echa Jesús oyecutucaa coiño oi tenta güi. Jare oyecuatía oi hebreo iñee pe jare griego iñee pe jare latín pe.

²¹ Jayave judío reta isacerdote reta itenondegua reta jei Pilato pe:

—Agüiyeta tei co reicuatía: “Judío reta juvicha guasu”. Reicuatía tei co: “Cuae cuimbae jei, Che co jae judío reta juvicha guasu” —jei reta.

²² —Cuae aicuatía vae aicuatía ma co —jei Pilato.

²³ Jare sundaro reta oicutu ma yave Jesús, irundi reve oñemombae Jesús jemimonde reta re omboyao ma yave. Erei jemimonde ipucu vae mbaeti oñembovívi. Oyeapo metei güiño. Cuae vi sundaro reta oequi chugüi.

²⁴ Jayave sundaro reta jei oyoupe:

—Agüiye ñamondoro. Ñañembosortea jese, yaicuaa vaera quia ra güirajata —jei reta.

Corai oyeapo Tumpa iñee pe oyecuatía oi vae. Echa oyecuatía oi corai: “Omboyao iyeupe reta cheremimonde reta. Oñembosortea cheremimonde re, oicuaa vaera quia ra güirajata”. Jorai oyecuatía oi, jare jorai oyapo sundaro reta.

²⁵ Jare oñemboi ñogüinoi Jesús icurusu iyipi pe Jesús ichi, jare ichi ipiqui, jare María - jae co Cleofas jembireco - jare María Magdalena.

²⁶ Jesús oecha ichi jare jemimboe jae oaiu vae oñemboi ñogüinoi coiño chugüi. Jare jei ichi pe:

—Chesi, joco oi nemembira.

²⁷ Cuae jaicue rupi jei jemimboe pe:

—Joco oi ndesira.

Jae rambue jocuae ora güive jocuae jemimboe güiraja jenta pe Jesús ichi.

Jesús omano

²⁸ Cuae jaicue rupi Jesús jei:

—I ayúe.

Corai oyeapo ma Tumpa iñee pe oyecuatía oi vae. Echa Jesús oicuaa opaete iparaviqui opa ma.

²⁹ Jare joco pe oi vinagre metei yapepo pe. Jayave omoaqui reta esponja vinagre pe. Jayave oñoño reta ivira re jare omondo Jesús iyuru pe.

30 Jare Jesús jou ma yave vinagre, jei:
—Opa ma.
Jayave ñacatindi jare omano.

Jesús iyique oyecutu

31 Jare jocuae ara judío reta oyeapocatu ñogüinoi pascua peguara. Jae rambue oyerure reta Pilato pe omopeuca vaera curusu re ñogüinoi vae reta itimaca jare güirajauca vaera joco güi. Echa mbaeti oipota jetegüe reta opita vaera curusu reta re jocuae mbutuu iara pe. Echa jocuae mbutuu iara omboete yae reta.

32 Jae rambue sundaro reta yogüiraja omope metei cuimbae Jesús ndive curusu re oyecutu oi vae itimaca. Jayave omope iru cuimbae itimaca.

33 Erei yogüiraja yave Jesús pe, oecha omano ma. Jae rambue mbaeti omope itimaca.

34 Erei metei sundaro oicutu metei mi pe Jesús iyique, jare oe voi tugüi jare i.

35 Jare oecha vae omombeu cae, pe reta vi perovia vaera. Jare cae omombeu vae añete co. Echa jae oicuaa cavi omombeu vae añete co.

36 Echa opaete cae oyeapo Tumpa ñee pe oyecuatía oi vae oyeapo vaera. Echa oyecuatía oi corai: “Ngaraa icagüe ave ope”.

37 Jare: “Omae retata jocuae oicutu reta vae re”. Jorai oyecuatía oi.

Oñoti reta Jesús

38 Cuae jaicue rupi José Arimatea pegua oyerure Pilato pe güiraja vaera Jesús jetegüe. Cuae José co jae metei Jesús jemimboe, erei mbaeti oyecuauca. Echa oquiye judío reta güi. Jayave Pilato jei chupe ipuere güiraja Jesús jetegüe.

³⁹ Nicodemo vi ou —jare co tenonde yave ojo pitu yave Jesús piri vae. Jae güeru mirra jare áloes oyeagüe vae. Oupiti ipoi treinta kilo rupi.

⁴⁰ Jayave ombogüeyi reta Jesús jetegüe, jare oñoma mbae ipiche cavi vae reta reve lienzo pe. Echa jocorai jecuaeño judío reta jeco jetegüe oñoti yave.

⁴¹ Jare Jesús oyecutucaa pe oi metei ivira reta ñogüinoia, jare jocuae ipite pe oi metei teogüeriru ipiau vae. Mbaeti quia oñeñoño pipe viteri.

⁴² Jocuae ara judío reta oyeapocatu ñogüinoi pascua peguara. Jae rambue oñono reta Jesús jocuae teogüeriru pe. Echa coiño oi.

20

Jesús oicove ye

¹ Jare ndei coe ngatu mbove semana iara tenondegua vae pe María Magdalena ou teogüeriru pe, jare oecha ita oñembosiri ma teogüeriru güi.

² Jayave osi ojo Simón Pedro jare iru temimboe Jesús oaiu vae pe, jare jei chupe reta:

—Güiraja reta ma ñandeYa teogüeriru güi, jare mbaeti roicuaa quiape ra oñono reta.

³ Jayave Pedro jare iru temimboe oe pave jare yogüiraja teogüeriru coti.

⁴ Mócoi reve osi pave, erei iru temimboe iñacua yae Pedro güi, jare ojo ovae teogüeriru pe Pedro jenonde.

⁵ Jayave oñavivi omae vaera japipe pe, jare oecha lienzo reta joco pe oi, erei mbaeti oi que.

⁶ Jayave Simón Pedro ojo ovae jaicue, jare oi que teogüeriru pe. Jare oecha lienzo reta joco pe oi.

7 Oecha vi lienzo Jesús iñaca re tenonde yave oñeñono vae oñeomaoma oi tee iru lienzo reta güi.

8 Jayave jocuae iru temimboe vi - jae Pedro jenonde ojo ovae vae - oique teogüeriru pe, jare oecha yave, oporogüirovia.

9 Echa ndei oicuaa cavi reta Tumpa iñee pe oye-cuatía oi vae quirai Jesús oicove yeta ou omanogüe vae reta ipite güi.

10 Jayave temimboe reta yogüiraja ye jo ae pe.

Jesús oyecuaa María Magdalena pe

11 Erei María oñemboi oi teogüeriru iyipi pe. Oy-aeo oi. Jare oyaeo oi rambueve, oñaivi omae vaera teogüeriru japipe pe.

12 Jare oecha mócoi araigua reta uguapi ñogüinoi Jesús jetegüe oñeñoa pe. Metei uguapi oi Jesús iñaca jendagüe coti jare iru Jesús ipita jendagüe coti.

13 Araigua reta jei María pe:

—¿Maera pa reyaao?

—Güiraja reta ma cheYa, jare mbaeti aicuaa quiape ra oñono reta —jei María.

14 Cuae jei ma yave, María oyerova jare oecha Jesús oñemboi oi joco pe. Erei mbaeti oicuaa jae co Jesús.

15 Jayave Jesús jei chupe:

—Cuña, ¿maera pa reyaao? ¿Quia pa reeca?

María oñemongueta tei jae co ivira reta ñogüinoia iñangarecoa. Jae rambue jei chupe:

—Carai, nde reraja yave, emombeu cheve quiape reñoño, jare che arajata.

16 —¡María! —jei Jesús chupe.

María oyerova ye icoti jare jei chupe:

—Raboni. (Cuae oipota jei: Oporomboe vae.)

¹⁷ Jayave Jesús jei chupe:

—Agüiye chepi. Echa ndei ayeupi cheRu piri. Erei ecua emombeu cherivi reta pe che jae corai: Ajata ma cheRu piri - jae co peRu vi. Jae co cheTumpa - jae co peTumpa vi —jei.

¹⁸ Jayave María Magdalena ojo omombeu Jesús jemimboe reta pe.

—Aecha ma ñandeYa —jei.

Jayave omombeu chupe reta Jesús jei chupe vae.

Jesús oyecuaa jemimboe reta pe

¹⁹ Jare jocuae pitu - semana iara tenondegua vae co - Jesús jemimboe reta ñogüinoia jonque reta oñeoquenda ñogüinoi. Echa jae reta oquiye judío reta güi. Jayave ou Jesús oñemboi ipite pe jare jei chupe reta:

—Peñembopiacatu.

²⁰ Cuae jei ma yave, Jesús oechauca chupe reta ipo jare iyique. Jayave Jesús jemimboe reta oyerovia. Echa oecha ma iYa.

²¹ Jayave Jesús jei ye chupe reta:

—Peñembopiacatu. CheRu chembou. Jae ramiño vi che pomondo —jei.

²² Jare cuae jei ma yave, ipitué omoe icoti reta jare jei:

—Amee ma peve Espíritu Santo.

²³ Peiro yave oipotagüe vae pe imbaeyoa re, imbaeyoa oñemboaita co. Jare mbaeti yave peiro oipotagüe vae pe imbaeyoa re, imbaeyoa ngaraa oñemboai —jei.

Tomás mbaeti güirovia Jesús regua

24 Jare jocuae doce jemimboe reta güi metei Tomás jee vae - jae co Chaguaqui pe oñembojee vae - mbaeti joco pe oi iru reta ndive Jesús ou yave.

25 Jare iru Jesús jemimboe reta jei Tomás pe:

—Roecha ma ñandeYa.

Erei Tomás jei:

—Mbaeti yave aecha oyecutuagüe ipo re jare añoño chepoaca oyecutuagüe pe jare añoño chepo iyique pe, ngaraa arovia.

26 Metei semana rupi temimboe reta ñogüinoi ye jocuae o pe. Tomás vi joco pe oi. Yepe tei onque reta oñeouenda ñogüinoi, erei Jesús ou oñemboi ipite pe jare jei:

—Peñembopiacatu.

27 Jayave jei Tomás pe:

—Emae chepo re. Eñoño cuae pe nepoaca. Eupi ndepo eñoño cheique pe. Agüiye mo eico ndeporogüirovia mbae reve. Mborogüirovia reve mo eico —jei.

28 —Nde co jae cheYa jare cheTumpa —jei Tomás.

29 Jayave Jesús jei:

—Reporogüirovia ma cherecha rambue. Oyerovia yaeta jocuae cherecha mbae reve oporogüiroviata vae reta —jei.

Maera oyecuatía oi cuae ñee reta

30 Jare Jesús oyapo jemimboe reta jovaque jeta iru miacañi reta oicuauca vaera quia co jae, yepe tei mbaeti oyecuatía oi cuae pe.

31 Erei aicuatía cuae pe oyecuatía oi vae, perovia vaera Jesús co jae Cristo - jae co Tumpa Tai - jare penoi vaera tecove opa mbae vae cuae perovia yave.

21

Jesus oyecuaa siete jemimboe reta pe

¹ Cuae jaicue rupi Jesús oyecuaa ye jemimboe reta pe i Tiberias jee vae iyipi pe. Oyecuaa chupe reta corai:

² Simón Pedro jare Tomás - jae co Chaguaqui pe oñembojee vae - jare Natanael Caná pegua - jocuae Caná Galilea pegua co - jare Zebedeo tai reta jare mócoi iru temimboe reta oñemboati.

³ Jayave Simón Pedro jei iru reta pe:

—Ajata ayeporaca vaera.

—Ore vi rojota nde ndive —jei reta.

Jayave yogüiraja oyeupi chalana pe. Erei jocuae pitu mbaeti mbae omboa.

⁴ Jare coeta ma yave Jesús oñemboi oi i jembei pe. Erei temimboe reta mbaeti oicuaa jae co Jesús.

⁵ Jayave Jesús jei chupe reta:

—Cherivi reta, ¿pemboa ma pa mbae?

—Mbaeti —jei reta chupe.

⁶ —Pemombo pepisa chalana iyacatu coti jare pemboata co jevae reta —jei Jesús.

Jayave jcorai oyapo reta, jare mbaeti ma ipuere omoata pisa i güi jeta yae jevae omboa ma rambue.

⁷ Jayave jocuae temimboe Jesús oaiu vae jei Pedro pe:

—Jae co ñandeYa.

Simón Pedro oendu yave jocuae cuimbae co jae iYa, oñemonde jare ogüeyi voi i pe. Echa omboi jemimonde oparaviqui cavi vaera.

⁸ Jare iru reta yogüeru chalana pe. Jae reta omoata pisa jevae reve. Echa coiño ñogüinoi i jembei güi - cien metro rupi.

⁹ Jare yogüeru oe i güi yave, oecha tata tatapii pegua joco pe. Oecha vi jevae i rupigua tata iárambue jare mbiyape vi.

¹⁰ Jayave Jesús jei chupe reta:

—Peru amogüe jevae pemboa ma vae.

¹¹ Jayave Simón Pedro oyeupi ye chalana pe jare omoata pisa i güi. Pisa tinie jevae tuicha vae pe - güinoi ciento cincuenta y tres. Erei yepe tei jeta yae, erei mbaeti omonoro pisa.

¹² Jayave Jesús jei chupe reta:

—Peyu rani pecaru.

Jare mbaeti metei ave jemimboe iquierei oparandu chupe: “¿Quia pa co nde?” Echa oicuaa jae co iYa.

¹³ Jayave Jesús ojo oipii mbiyape ome chupe reta. Jae ramiño vi ome chupe reta jevae.

¹⁴ Jare mboapi vese ma cuae re Jesús oyecuaa jemimboe reta pe oicove ye güire ou omanogüe vae reta ipite güi.

Emongaru chevecha reta

¹⁵ Ocaru reta ma yave, Jesús jei Simón Pedro pe:

—¡Simón, Jonás tai! ¿Cheraiu yae pa cuae reta güi?

—Roaiu, cheYa —jei Pedro—. Reicuaa che roaiu co.

—Emongaru chevecha-rai reta —jei Jesús chupe.

¹⁶ Jesús jei ye chupe:

—¡Simón, Jonás tai! ¿Cheraiu pa?

—Roaiu, cheYa —jei ye Pedro—. Reicuaa che roaiu co.

—Eñangareco chevecha reta re —jei Jesús.

¹⁷ Jesús jei ye chupe mboapia re:

—¡Simón, Jonás tai! ¿Cheraiu pa?

Pedro ipiatiti. Echa mboapi vese ma Jesús jei chupe: “¿Cheraiu pa?” Jayave jei ye:

—CheYa. Nde reicuaa opaete. Nde reicuaa che roaiu co.

—Emongaru chevecha reta —jei Jesús chupe—.

¹⁸ Añete che jae ndeve, nde ndetairusu yave, reyecuacua jare reguata reipota reoa rupi. Erei nendechi yave, reupita ndeyiva jare iru vae ndeocuata jare ndererajata mbaetita reipota reoa pe —jei.

¹⁹ Cuae jei Jesús omombeu vaera quiraita co omano Pedro. Jare Pedro omano yave, Tumpa oñemboeteucata co imano rupi. Jayave Jesús jei ye Pedro pe:

—Eyu che ndive.

Temimboe Jesús oaiu vae

²⁰ Pedro oyerova yave, oecha jocuae temimboe Jesús oaiu vae ou jaicue. Jocuae temimboe co jae tenonde yave ocaru ñogüinoi yave ocaru oi Jesús iyipi pe jare: “¿Quia pa nemoeterengata, cheYa?” jei chupe vae.

²¹ Jare Pedro oecha yave jocuae temimboe, oparandu Jesús pe:

—¿Mbae pa oyeapota chupe, cheYa?

²² Jesús jei chupe:

—Che aipota yave jae oico vaera che ayu ye regua, agüiye ndepiatiti jocuae re. Nde eyu che ndive —jei.

²³ Jare opaete oporogüirovia vae reta oicuaa cuae Jesús jei vae, jare oñemongueta tei cuae oipota jei jocuae jemimboe ngaraa omano. Erei Jesús mbaeti jei ngaraa omano. Jaeño jei: “Che aipota

yave jae oico vaera che ayu ye regua, agüiye ndepiatiti”.

²⁴ Che co jae jocuae Jesús jemimboe, jare che amombeu añete co cuae pe oyecuatía oi vae. Echa che aicutía cuae. Jare opaete roicuaa cuae amombeu vae añete co.

²⁵ Jare oime ye jeta mbaembae Jesús oyapo vae. Opaete cuae mbaembae regua oyecuatía oi yave meteitei rupi, oatata opaete tupapire jendara ivi pe. Amén.

Nuevo Testamento Guaraní Pe
New Testament in Guaraní, Eastern Bolivian
(BL:gui:Guaraní, Eastern Bolivian)

copyright © 2012 Wycliffe Bible Translators, Inc.

Language: Guaraní, Eastern Bolivian

Translation by: Wycliffe Bible Translators, Inc.

Guaraní, Eastern Bolivian [gui], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Eastern Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

577acc2d-2f51-5700-8a70-613f34a2faba